


- 1 Jani Gulielmii Verisimilium Libri tres.
Antuerpiae 1582.
- 2 Mureti - M. Antonii - Institutio Puerilis ad M. Antonium Fratrem F.
- Mondici in Christophoro
Juano. Romae 1544.
- 3 Hortensii - Julii Roscii -
Emblemata sacra S. Stephani
Caelii Montij Inter
columniis affixa. 1589.
- 4 Boni - Joan. Baptistae - Epi
nicius Ludovico Francorum
Regi ob receptam Pyrellam?
Romae 1624.

5. *Perizonius a. Uenud -*
Francisci - Tho. N. Andreo
Alciato doctus N. Rudovi-
culatum Apologia
Lugduni 1538.
6. *Leypico - Lodovico - Arte*
Poetica li. 2. Horatio Flac-
co tradotta. in Roma 1635.
7. *Figliuccius - Flaminio -*
Quodam Cardine creati
ab Urbano VIII. P. M.
Romae 1626.
8. *Quanti Caselli - Jacobi -*
Variaum Libi duo.
Lutetiae 1582.




6
I A N I
G V L I E L M I I
V E R I S I M I L I V M
L I B R I T R E S.

BIBLIOTECA NAZ.
ROMA
VITTORIO EMANUELE



ANTVERPIAE,
Ex officina Christophori Plantini.
M. D. LXXXII.

LIBRARIUS
VERISIMILIUM
GALLIENI




LIBRARIUS
VERISIMILIUM
GALLIENI

AD ILLVSTREM ET
GENEROSVM DOMINVM
IO. CYRIACVM L. BARONEM POL-
HEMIVM, ET VVARTENBVRGICVM, &c.

IANI GVLIELMI

Lubecensis

P R Æ F A T I O.



V M multis in rebus ve-
rū experimur, quod à sa-
piētissimis viris proditum
est, honestum suapte vi
pollere, aliena illa laudis
atque utilitatis lenocinia,
vt alliciat impellatq. ho-
minum animos, non desiderare; tam nus-
quam magis, meo iudicio, opinor tuo etiam
generosissime I O. CYRIACE, quàm in
humanitatis & litterarum studiis. Etenim si
cogites, quid id sit, quod optimam quamque
indolem inflammatam studio rapiat ad anti-
quitatis rerumq. gestarum memoriam, quæ-
que de virtutibus est doctrinam, adeoque
vno nomine humanitatem cognoscendam,
excitetque ad cultum linguarum earum, qui-
bus inclusi hi thesauri rerum nobilissimarum
tenentur; non temerè reperiās aliud præter

opinionem, non auditione acceptam illam, sed à natura insitam atque innatam, honestissime sciri omnia hæc; ignorari ac prætermitti turpiter, & ab ignavissimo quoque, aut, quod iuxta est, stolidissimo, quive, quid in hac naturæ præstantia hominem imprimis deceat, illustretque maximè, perspicere non possit. Præmia quidem doctrinarum ac virtutis ab imperitissimis occupari sentimus, quorum opera popularis, & splendor in vulgus est: neque id rectè, an secus fiat, nunc disputo; hoc quidem, ego si taceam, res ipsa loquatur, ut ad opes honoresque nitare, coli & amari litteras non posse: quas qui arctius amplectuntur, iam etiam vltro sibi, mitto dicere ad dignitates & opulentiam (nam ferendum hoc quidem aliquo modo esset tamen) sed ad ipsam quoque, si diis placet, veram & solidam laudem aditum præcludunt. Huc enim rerum ventum est, & parum fuit imperitiæ diuitias ac honores ex victis litteris spolia cepisse, nisi hoc quoque dedecus inurent, inertesque & insanas audire vulgo coegerent. Itaque quod ille olim monebat sapientes, ut latèrent, & se à luce publica & turba fama que etiam hominum in otium & tenebras vindicarent, satisque habèrent bene vixisse, & latuisse; hoc nunc ut aliter faciant

copiæ

copiæ non est: quippe vbi in maximis tempe-
 statibus, quibus multas respublicas iam pes-
 sum ire videmus, vt quisque à doctrina reli-
 ctissimus atque imparatissimus est, vt ab hu-
 manitate refugere semper visus est longissi-
 mē, ita facillimē ad clauum admittitur: hi,
 quibus solis suæ reipublicæ gubernacula Pla-
 to commendat, si viuere iam, & in sentina
 iacēre possunt, pulchrē discedunt. Nam phi-
 losophum quidem nunc quis ē multitudine
 admiratur? quis non cū occasio est irriden-
 di, arripit? adeoquē si nulla est, tamen arri-
 pit nullam? *nemo, herculē nemo*: vt ait in re
 simili Persius, nisi qui aut eodē morbo (nam
 quæ nunc tempora sunt, hoc verbo vtendum
 est) laborant, eandemquē se in corruptelam
 coniecerunt; aut diuino quodam iudicio
 (quod genus in multis millibus vix singulos
 reperiās) quanto plus in recessu litteræ boni
 habeant, quàm primore fronte de se promit-
 tunt, animaduernerūt. Quamobrem si quem
 neque rei suæ respectus deterret, neque, quæ
 plerosque omnes transuersos agit, ambitio
 retrahit, neque hominum sermo moratur,
 quin animi sui sententiam accedat, perpē-
 tuoquē deindē quem initio cursum petiue-
 rit teneat, quid eum aliud censebimus, quàm
 posteaquam ad eius oculos honesti pulcritu-

do alluxerit, mirifica illa specie sola percussum, tamquam deo impletum, parui putasse omnia, præquam ne illud è manibus atque amplexu amitteret. Et mihi quidem in hac cogitatione versanti, tu imprimis occurrere soles, generosissime I O. CYRIACE, qui vtrumque, & perspexeris speciem hanc prudentissimè, & amâris constantissimè. Vidi enim ipse ante paucos annos, Rostochij cùm viueremus vterque, incredibilem contentionem animi tui, & exercitationes in omni studiorum genere assiduas: cùm tu nobis omnibus præires exemplo non modò diligentia, sed etiam continentia; neque solùm voluptati, sed omnino otio; siue verius est requiem dici, atque intercapedinem laboris; bellum indiceres, vt in optato sapientia portu maturè conquiesceres. Itaque in tanto auditorum numero, quantum & opportunissimæ vrbis sit us fama que celebris Academia, & clarissimorum virorum Caselij, Brucae, Chytræorum, aliorumque auctoritas facere poterat, nemo magis doctoribus in ore erat, quem illi sobrium continentemque laudabant, vt naturæ tamèn bonum agnoscerent, totumque cælo fluxisse, vt i ne si velles quidem posses à te ipso desciscere: diligentiam illam memorabilem & nescio

an in

an in vestro isto ordine sine exemplo, cum dies noctesq. tibi instares; quando id in optima natura plerumque contrà occurrit; sic admirabantur, nihil vt posse præclarius faterentur. Magnum hoc, magnum in homine copioso & beato; in eo verò qui genere cum nobilissimis Germaniæ nostræ comparari, opibus anteferri etiam plerisque possit, vix iam humanum est. Me quidem certè ita cepisti, vt & tunc statim admirari te cœperim, & hoc tēpore cuius patrocínio librum hunc potius committere vellem, ex omni nobilium nostrorum flore repererim neminem, tum ob auctoritatem nominis tui apud omnes merito tuo maximam, quæ mihi & præsidio aduersus inuidorum calumnias & honori ad famam bonorum futura esset: tum propter summam illam & notam pridem mihi humanitatem tuam. Qui enim iam olim ea quæ admodum adolescentulo exciderunt, non aspernari visus es, vt hæc non item lubenter in clientelam tuam recepturus sis; videor metuere non debere; non illa quidem fortasse multo politiora, neque priuatim ad famam nominis mei vberiora, sed tamen, si iudicare mihi de studiis meis permittitur, multo publicè vtiliora. Nam reliquis in rebus scriptione supersederi sæpe poterat; cum

omnia politissimi vetēres ꝓ & inuenerint, quā iij qui nunc sunt homines, acutiū, & differuerint ornatū: hoc genus hac litterarum ætate, & librorum ea, qua laboramus infinita propemodum mole, solū nēcessarium est: si quidem interest linguarum & artium, limpidissimos fontes antiquorum hominum; ē quibus solis illæ rectē & præfiscidē hauriuntur; iniuria tēporum turbidos, obstructos etiam sæpe, retari & perpurgari; quod certē interest, id quē arbitror negaturū neminem, nam libri vel sapientissimē scripti, nisi intelligantur, vñ esse non possunt; sed nec intelligi; si maculis scateant. Ita fit, vt hisce eluendis operam qui impendunt, eādē pulcerrimis monumentis & integritatem nitoremque suū restituant, & lucem fenerentur. Quod vtrumque & ipse heic secutus sum certē; quantum autem consecutus sim tu iudicabis generosissime I O. CYRIACE & à te eruditi viri alij: quos tamen; si cogitabunt, hanc me scribendi viam primum popularium meorum, præcedente quem subsequeretur nullo, ingressum; æquiores spero futuros industriæ meæ; neque tam reprehensione, sicubi defecero, quā, vbi perduxero, laude dignum iudicatuos. Te quidem qua es humanitate, certē scio con-

natus

P R Æ F A T I O.

natus hosce meos non improbatum, excusaturumque offensusunculas, quæ erunt, apud alios adolescentiæ, nonnullos etiam patriæ nomine. Quod ut facias & à claritate nominis tui hæc nostra splendoris nonnihil mutuari patiare, meque aded totum aduersus maliuolos tuendum tibi defendendumque suscipias, etiam atque etiam abs te peto. Vale. In Agrippinensibus, Kalend. Decembris. ∞ . D. XXXI.

* 5 I N

IN IANI GVLIELMI VE-
RISIMILIVM LIBROS
FRANCIS. MODII BRVGENSIS
ELEGIA.

ET meritò quoniam dia hic inhonora iacebat
Doctrina, ad populos iuit Hyperboreos:
Vt quos tantum olim merces audire solemus
Tractare, atque illis anteponeare nihil,
Ingenuis certent nostris: nunc & bona captent
Quæ metuant vlla posse perire die.
Sic solet illa fouis iusti iustissima proles;
Aufert contemni quæ sua dona videt.
Ergo igitur quas præsentem despectimus artes
Cum magna absentes quarimus inuidia.
Etsi cur aliis hac inuidcamus, inante
Publica quæ in nobis temnere fama solet?
Quin potius fauceo laudem hanc, & gratulor illam
Seu tibi GVLIELMI siue tua patria.
Est fateor LVBECCVM aliis amplissima rebus,
Regum quæ quæ suis æquet opes opibus:
Sed commune illud si non cum pluribus illi est,
Cum paucis certe haud esse negare potes.
Laus erit una dehinc, communem dicere nemo
Quam queat, ingenio parta tropæa tuo.
Hoc uno LVBECCVM vrbes supereminet omnes;
Nec solum HANSATICI est fœderis illa caput,
Sed memoranda orbi, qua iungit mane nouo sol,
Et qua defessos vespere soluit equos.
Ergo ô felicem te, ô terque quaterque beatum
GVLIELMI, per quem sic patriæ auxit honos.
Debebas

Debebas illi vitam, maiora dedisti,
Nec moriens quisquam plura aliquando dedit.
Quam tu viuenti viuens largiris, honore
Dum illam tam solido perpetuóque beas.
Et tu LVBECCVM, mere flos, atque urbium ocelle,
Qua fors fortuna par potis esse tua est?
Nomine calum aquas, & tangis sidera fama,
Sine GVLIELMI munere siue tuo.
Nec reliquum est aliud, magis & magis ut clarescas
Porro etiam quàm illum ut debito honore colas.
Ingenio qui te & calamo super athera vexit
Ne illum fors pigeat gratuito esse pium.
Gaudet honorari virtus, & digna merendo est:
Quippe homines solet qua facere vna deos.

INDEX

INDEX CAPITVM QVÆ

LIBRO PRIMO.

CAPVT. I. Misargyrides. Plautus Mostellaria emendatus locis tribus.

CAP. II. Habe tibi res tuas. Duûm locorum Afranij apud Nonium correctio.

CAP. III. Insignis M. Varronis sententia correctâ. item Plautus, Terentius, Ouidius leuiter.

CAP. IIII. Bona scaua. Panitet. Priui custodes. Imo-
do. Pessum ire, premere. Plauti Pseudolus multis locis emendata, vno Mostellaria.

CAP. V. Hendecasyllabi poëta veteris apud Isidorum maculosissimi nitori suo restituti.

CAP. VI. Obserere beneficia, pugnoscere fallaciâ. Bitere & bitare. Attij fragmenta aliquot correctâ, & Plautus Pœnulo.

CAP. VII. Tubuli. Animi angere. Pretio vincere. Cicero Verrinis aliquantis locis emendatus.

CAP. IIX. Vita familiaris. Lubens. Lubentia. Plauti Persa duûm locorum restitutio.

CAP. IX. Truones. Silus. In Festo pauca animaduersa.

CAP. X. Videri scribendum saltem, non, vt vulgò, saltem. Illustratus Gellius lib. XII. cap. XIII.

CAP. XI. Pergula. Creta in toga candidati. Insipare. Padidum. Pomponius apud Nonium restitutus pluries.

CAP. XII. Notatum prouerbiû, Ossa atque pellis. tum Virgilius, Ouidius, Plautus emendati.

CAP. XIII. Notatum item prouerbiû, Vipera est in veprecula. Cacabus. Illustratus Virgilius, & Cicero pro Sextio.

CAP. XIV. Votitus. Tamenetsi. Nullus pro non. Casina prologo versus, item alter ipsa in fabula restitutus & Terentius Andria.

CAP. XV. Varronis duo fragmenta composita. eiusdem
Modij

Modij argumentum, & indidem sententia adducta expressa de Plauto.

CAP. XVI. Euripidis Medea locus emendatus, & cum simili Ciceronis compositus.

CAP. XVII. Pacuuij versus aliquot compositi de coniectura, & correcti.

CAP. XIX. Vocare. Vocationes. Emendatus Eunuchus Terentius bis, Stichus Plautus semel.

CAP. XIX. Aucupare. Quo pro quod. Threces. M. Varro De lingua Latina quarto libro correctus: item Cacilius.

CAP. XX. Praesidium pro viatico. Emendata Plauti Pænulus.

CAP. XXI. Pecua praeia. Praeia. Species luminis. Specere. Atij fragmenta multoties emaculata apud Nonium.

CAP. XXII. Aui aduersa. Ilij. Addubitatum de Plauti versu Bacchidibus: alius indidem emendatus.

CAP. XXIII. Mos antiquus in nuptiis. Mutinus Trinius. Mutinum, Muto. Mutoniatus. Praesidere. Correctus Lactantius, & locis duobus Lucillius.

CAP. XXIV. Plauti Stichus emendata locis duobus, vno Trinumus, item Titinnius leniter.

CAP. XXV. M. Varro quinto De lingua Latina emendatus.

QVÆ LIBRO II.

CAP. I. Lucillij Saturæ xxx. quod videatur fuisse argumentum. in eam rem complures ex ea versus adducti, & de coniectura compositi, correcti.

CAP. II. Mansum ex ore dare, prouerbum. Oreâ. Culpa. Eadem Saturæ emendatus Lucillius.

CAP. III. Tagere. Tagaces. Peruenari. Truculentus Plauti correctus.

CAP. IV. Exante. Inante. Insuper habere. Superesse pro defendere. Emendatus Appuleius & de Oratore Cicero.

CAP.

INDEX CAPITVM

CAP. V. Tegillum & tectum, pro veste. Alieni. Appuleius correctus: item Lucillius apud Nonium & Cato apud Festum,

CAP. VI. E Plauto insigne glossema sublatum: tum emendati & concinnati versus aliquot.

CAP. VII. Tolutim ire. Acupediis. Sonticum. Remos detondere. Emendatus Nonij versus, & complures Lucillij.

CAP. IIX. Consilium. Consiliari. Opus approbare. Durare. Illustratus Plautus Poenulo & Asinaria.

CAP. IX. Lucillij fragmenta aliquot correctâ, composita, & cum Terentij loco simili collata.

CAP. X. Eiusdem Lucillij versus cum Terentij & Virgilij compositi: tum adducta in medium & emendata insignis sententia.

CAP. XI. Herere alicui. Numerus. Neglegi pro neglecti. Sacramenti militaris formula. Correctus Cicero Philippicis, & Terentius Adelphis.

CAP. XII. Sarcinare. Acia. Machina sarcinatricum. Nonius restitutus, & explicatus apud eum Varro.

CAP. XIII. Eloq̃ pro illico. Plautus Menachmis & Truculento emendatus: item Varro.

CAP. XIV. Mos antiquus laudandi nouam nuptam, & cur iactati in nuptiis fescennini.

CAP. XV. St. Cautes Terentij Heautontimorumenos correctâ.

CAP. XVI. Surde audire. Surdo narrare. Græca mercede curare. Homo non fescuncia. Correctus Pomponius.

CAP. XVII. Rota fortuna. Peculiares serui & ancilla. Tunica laxa. Tibullus illustratus locis aliquot.

CAP. XVIII. Frater cibarius. Cibicida. Amicus ferentarius. Varronis fragmentum emaculatum, & cum altero compositum.

CAP. XIX. Quid nisi. Tempori. Andria Terentij versus tres de coniectura constituti.

CAP.

CAP. XX. *Plautus Asinaria emendatus.*

CAP. XXI. *Tricari. Tricones. Reposcones. Abundare voluptatibus. Turpilij fragmenta emaculata.*

CAP. XXII. *Correctus Plautus Casina & Mostellaria.*

CAP. XXIII. *Fragmenta Turpilij aliquanta restituta.*

CAP. XXIV. *In A. Cellio pauca animaduersa: & correcti versus Caciliij.*

CAP. XXV. *Aliuta. Afferere. Rudente Plauti duum locorum correctio.*

QVÆ LIBRO III.

CAP. I. *Interdare. Bonis emungi, eluere. Offrehari. Plautus Captiuus emendatus, & si fortè, Rudente.*

CAP. II. *Exsiliij causa solum vertere. Fatiscere. Cicero epistola ad Brutum emaculatus.*

CAP. III. *A se spernere. Virtus. Maculam eluere. Fustipectere. Plautus Stichus correctus & Ennius apud Nonium.*

CAP. IV. *Actores. Miluina. Externatus animi. Loca lautia. Restitutus Appuleius pluries.*

CAP. V. *Sparti. Tages. Emaculatus Censorinus, & fragmentum L. Attij.*

CAP. VI. *Tentio. Tentigo. Tendere. Mors Aristotelis. uōica Morta. Ex eodem Censorino menda aliquot sublata.*

CAP. VII. *Rata vota. Resignare. Lena. Discingere. Emaculati versus aliquot Martialis.*

CAP. IIX. *Exefficio. Curiosi, prouerbiū. Correcta fragmenta Afranij & Neuij: & illustratus Plautus.*

CAP. IX. *Reprehendere. Omnes inimicos repperire, prouerbiū. Rauī. Correctus Plautus Epidico, Terētius Andria.*

CAP. X. *Tempori. Magis magisque. Scuta proiecta. Emaculata fragmenta Sisenna.*

CAP. XI. *Oram orationis adbibere. Ora pro rei initio. Miles Plauti emendata.*

CAP. XII. *De silicernio notata quapiam. λῆχοι. Rappere*

pere de rogo canam. Bustirapi. Correcta glossa veteres. & apud Nonium Varro.

CAP. XIII. Mundus. In mundo esse. Satullè. Emaculatus Appuleius: item Plautus Persa, & Gellius.

CAP. XIV. E Quintiliano macula aliquot sublata.

CAP. XV. Pigmenta. Frumen siue rumen. Frunisci. Ruminari. Irrumare. Varronis fragmenta aliquot correcta: duo composita.

CAP. XVI. Escendere. Exscendere. Neruias extendere. Cicero, Varro, Festus, Cæcilius emendati.

CAP. XVII. Flectere comam. Prata. Candida. Trita. Colere. Emaculata multa in Martiale.

CAP. XIX. Riuales. Luna aquulenta. Varro apud Nonium correctus.

CAP. XIX. Βῆς ἐν πόλει, proverbium. Despectare. Hiscere. Martialis emendatus.

CAP. XX. Carmen. Carminare. Plautus emendatus Menachmis.

CAP. XXI. Tria Varronis fragmenta apud Nonium composita.

CAP. XXII. Martialis aliquot locis emendatus. Biuira.

CAP. XXIII. Pompa. Nihil amare. Cassa specula, terricula. Mulo infcior. Muli. Cistellaria Plauti explicata, emendata.

CAP. XXIV. Dñum item locorum in Plauto correctio.

CAP. XXV. Exigere. Defendere pro arcere. Aucre. In Martiali: versus aliquot emaculati.

IANI GVLIELMII
 VERISIMILIVM
 LIBER PRIMVS.

CAPVT I.

*Misargyrides. Plautus Mostellaria emenda-
 tus locis tribus.*



EPIDE ludunt Comici in persona-
 rum nominibus ad rem quã repræ-
 sentant accommodatè excogitandis:
 & plerumque illi quidem iis quæ co-
 gnatione quadam cum re cohèrent,
 interdum tamen & contrariis quàm
 res poscat confingendis, ludos vrbanißimos faciunt.
 Ita Plautus Persa parasito nomen fecit Saturioni, cui
 venter numquam non creparet inedia, planeque e-
 surio, vt ipsemet ait, esset: non saturio. Simile com-
 mentum excidisse suspicor Mostellaria, Scæna Sce-
 lestiorem ego annum.

——— *Hic it ad me. saluus sum,*

*Spes est de argento. TR. hilarus est frustra isthic homo,
 Saluere iubeo te mi Saturites benè.*

Mouet me, quod in suis libris inuenit doctissimus
 Camerarius, *mi satirites*: quibus coniunctis & leui-
 ter immutatis lego, *Saluere iubeo te Misargyrides benè*.
 Primum proximè ductum scripturæ veteris: tum ve-
 nustè arbitrabar ἀντιπαρ' & αργεντι-odum, qui ita
 lucellum inhiaret, vt vel os sibi verberari pugnis, mo-
 dò argenteis, facile pateretur. Postremò in Adelphos
 Terentij Donatus liquidò confirmat Misargyriden

trapezitæ Plautini nomen esse, quem frustra alibi
quæras, si hunc quem ~~te~~prehendi amiseris. Eadem
Scæna, Serui qui cùm.

*Vide sis ne forte ad merendam quopiam deuorteris,
Atque ibi meliusculè quàm sat fuerit biberis.*

Malim legere: *Atque ibi ne plusculè.* Mox:

Ita dico, ne ad alias adis perperam deueneris.

PH. Scio quàm me ire oportet & quò venerim: noui loqui.

Hæc ut alij explicent, non me fugit: sed verius existi-
mo perperam vulgari, corrigendumque esse:

Scio quò me ire oportet, & quò venerim noui loci.

Locus, loquus; ut cocus coquus, secor sequor, alia
promiscuè scribebant: & παρέλκον elegans est, simile
istis: vbi loci, huc locorum, huc viciniæ. Terentius:

Interea mulier quadam ab hinc triennium

Ex Andro commigravit huc viciniæ.

In *Terentio* Itã interpreter vetus, quem sequi quàm Nonium mul-
to malo. Sic enim & Plautus Mercatore:

Ut isthuc est lepidum! proximè viciniæ

Habitat.

Probat emendationem meam & hoc quod subiicit
statim, quò venerit:

Philolaches hic habitat, cuius est pater Theuropides.

C A P V T I I.

*Habe tibi res tuas. Dũm locorum Afranij apud
Nonium correctio.*

VI M negocij hominibus eruditis offudit Nonius:
dum optimis scriptoribus adinutilandis mendorum
segetem serit ita vberem, ut ei ne cum Theseo qui-
dem Hercules extirpandæ futurus videatur. In ea
nos quoque non inutiliter laborasse,

Sperat

Sperat quidem animus, quod euēniat diis in manu est.

In Vaser.

Afranius Diuortio. Qui coner noctu clanculum brusire dotem ne remittas vaser, honeste vt latites & nos laudas diutius.

Intricarunt hæc plexique, dum nodum in scirpo quærunt: extricauit, quod sciam, hæctenus nemo. Lego:

— qui conere noctu clanculum

Rus ire, dotem ne repromittas vaser:

Honeste vt latites, & nos ludas diutius.

*Argumentum fabulæ ex titulo vidēre est fuisse de discessione coniugum: in ea dos reddebatur vxori iure Romano: id ex veteri formula notum, HABETI-
BI RES TVAS: ad quam allusit Philippica II. Cicer-
ero. Illam suas sibi res habere iussit, ex duodecim tabulis: clanes ademitt, forasque exegit. Apuleius Milesiarum
tertio: Tu quidem, inquit, tibi istud tam dirum facinus: confestim toro meo deuorte: tibi que haberes tuas. Porro
vt spondebant, promittebant; ita respondebant, re-
promittebant præsentis. hoc itaque insimulatur ma-
ritus, rus cogitare, ne dotem repromittat.*

In Coniicere.

Afranius Incendio. Seruus est mihi Nicasio sceleratus curiosus. is cum filio ei coniicere ad nescio quid de latriuncula.

Hæc in versus repono, & emaculo, cumq. alio loco, quem laudat idem Nonius in Concedere; ita cōparo:

— Seruus est mihi Nicasio

Sceleratus, curiosus; is cum filio

It coniicere hac nescio quid de latriuncula.

Atque eccum incedit, hōc procul concessero.

*coniicere est parat coniicere, vt Terentio It visere. libris fuisse videtur Eit ἀρχεινός: quod postea lo-
corumpendo fuit.*

Insignis M. Varronis sententia correctâ. item Plautus, Terentius, Ouidius leuiter.

M. VARRONIS doctissimam sententiam aliis frustra tentatam nuper mihi persanasse visus sum apud Nonium in Calx,

*Nemini fortuna currum à carcere intimo missum leui
Inoffensum per aquor candidum ad calcem subit.*

Emendationem meam subiiciam, rectè an secus existimatio erit doctorum: sic igitur in septenartos repono.

*Nemini fortuna currum missum à carcere intimo
Labi inoffensum per aquor candidum ad calcem finit.*

Nocuit huic loco, quod innumeris aliis bonorum scriptorum, ignoratam diu fuisse cognationem V & Blitterarum. Cùm ergo in veteribus laui esset, quod erat *lebi*: isti correctores *leui* fecerunt: quem errorem commissum etiam suspicor eiusdem Varronis *λογιστοποίησιν ἢ περὶ φθορᾶς καὶ σμικρῶν*, quem locum adscribam, compositum à me cum fragmento altero, quod eodem libro idem Nonius conseruauit, vt emendandum existimo,

*Pollinum
et in
anima pro
uero*

Propter cunas capulum positum est,

Nutrix tradit pollinctori.

Detis habenas animæ labi,

Dum ventus nos flamme sudo

Suauem ad patriam perducit.

Versus sunt anapæstici dulcissimè facti. teritiò vulgatur, *animæ leui*: mendosè opinor. labat enim versus: & tamen si quis contra tendet, pertinax heic non sum. Eadem caussa nœuum adspersit versui Plautino, Trinumo:

Si ani-

Si animus hominem perpulit, actum est: animo seruiuit, non sibi.

Si ipse animum perpulit; dum uiuit, victor victorū cluet. Verum enim est, *seruibit.* antiquè, vt *audibit.* Si, inquit, semel animo indulseris, ætatem illi seruitutem seruiēs. Porro *sinit* scripsi, vt versus constet: potuissē sinit; sed dixisse veteres *sini*, quod nos enuntiamus *siui*, notum est. id etiam in Terentio fuerat, *Andria:* *ut. 1. 4.*

Dum tempus ad eam rem tulit, sini: animum vt expleret suum.

sic enim ms. Colonienſis: absque quo esset, potuisset nos vel Donatus monuisse de mendo. ait enim antiquè dictum; tum aliter vsurpari Adelphis, *Non sinit egestas facere nos.* In vtroque frustra erit, si publicatos libros sequare. Sinit igitur cū esset in Nonio, imperiti mutarunt in *sinit*, aut quod idem est, & in vetustis editionibus exstat, *sibit*: vnde porro subiit *istud subit.* Neque mihi dubium est, quin respexerit huc Ouidius Tristibus: *Eleg. 4. lib. 3.*

Nam pede inoffenso spatium decurrere vitæ.

Dignus es, & fato candidiore frui.

ita libri scripti. vulgò, *procurrere*; ineptissimè. At illo modo Cicero Catone: *Quasi decurso vita spatio ad carceres à calce reuocari.*

CAPVT IIII.

2

Bona seaua. Panitet. Priui custodes. Imodo. Pessum ire, premere. Plauti Pseudolus multis locis emendata, vno Mostellaria.

PLAUTI Pseudolus quod habet in editionibus vulgariis: *Studete hodie mihi, bona in scenam adfero, Nam bona bonis ferri reor æquum maximè.*

Vitio librariorum corruptum censeo, polluláq. mutatione legendum, *bonam scauam*. vt hoc dicat, auspiciatò siue bono & liquido auspicio in scenam se progredi. nam & ludi auspiciatò & bono cum omine committebantur, & aliter si fieret, instauratiuis opus erat. Bona scaua idem quod auspicium bonum. hac fabula infrà:

Benè ego ab hoc prædatus ibò, nomi: bona scaua est mihi.

Scæna Pseudole non:

Metuunt credere omnes. B A. eadem est mihi lex, metuo credere.

P s. Credere autem? eho, an pænitet, quãdo hic fuerit vsui? Leuiter corrigo, quanto hic fuerit vsui. Musæum planè loquendi genus, pro eo quod est, Viderúrne tibi parum fuisse vtilitati & lucro. Terentius:

At enim (dices) me quantum heic operis fiat pænitet.

M. Tullius proæmio Officiorum: Tam diu autem velle debebis, quoad te quantum proficias non pænirebit. Exempla similia passim obuia. Scæna Forum coquinum:

Item his discipulis prius custodes dabo.

Non certius vixisse Plautum, quàm eundem scribisse, prius custodes dabo. idque vificit ipsa orationis series. Primi vetustè, qui nobis singuli. Lucillius: lib. 30.

Culcitula accedunt prius centomibi vinis.

Scæna Vox viri pessumi.

s i. quid lubet? pergin ructare in os mihi? p s. suavis ructus est mihi, sic sine modo.

Posteriora Nonius laudat, sic sine si modo. emaculandum suspicor, sic sine: i modo. Ea enim cum fastidio à se quempiam reiicientis formula est Comicis vfitatissima. Stichò:

Nescio quid vero habeo in mundo: p p. i modo,

Alium conuinam querito in hunc diem tibi.

Eadem

Eadem Scæna paullò pòst:

Sed Simo vt probè tactus Ballio est! quæ tibi dixi

Effecta reddidi. s i. derides? pessumus homo est.

Inclinat animus credere, scribisse pòctam, *pessum is homo iit.* Pessum ire, perire est: vt pessum date, perdere: & in eadem significatione, pessum premere. Mostellaria: *Istum pro suis factis pessumis pessum premam.* Ducta translatio est à re maritima: argumento est locus Cistellaria:

*Maritumis moribus mecum experitur, ita meum frangit
amantem animum,*

*Neque, nisi quia miser non eo pessum, mihi vlla abest
Perdito perniciēs.*

Sine figura vsurpauit Rudente:

Nunc eam cum navi scilicet abiuisse pessum in altum.

&, nisi admodum fallor, Mostellaria quoque, Scæna
Melius anno hoc:

Sed Simo, ita nunc ventus nauem nostram

Deseruit. s i. quid est? quo modo pessimè potuit

Quæ ne subducta erat tuto in terram ante hac?

Legō enim, quo modo pessum ire potuit. Non potest, inquit, vt submersa vobis navis sit, quam in terram dudum subduxistis. Et confirmat correctionē meam, quod subiicit mox Tranio:

Venit navis nostræ quæ frangat ratem.

C A P V T V.

*Hendecasyllabi pòcta veteris apud Isidorum maculosissimi
nitori suo restituti.*

F A T E N D U M est: nimium amo antiquorum hominum ingenia, multoquē lubentius pasco auiditatem meam relliquiis eorum quantum libet ambefis

blattarum, &, qui non minus infesti iis, emendatorum dentibus; quàm luculentis cœnis vbique nunc scripturientium. Itaq. cùm incidissem nuper in bel-laria nescio cuius poëta, temperare mihi non potui, quin vt defæcanda arbitrarer sententiam meam de-licatis conuiuatoribus proponerem. Sic igitur Isido-rus Etymologici libro x i x. cap. x x x i i.

Thynius (anulus) purus est, primùm in Bithynia fabrica-tus, quam olim Thyniam vocabant. Flaccus: Lugente mea vi-ta nec smaragdos beryllósque mi Flacce, nec nitentes per can-dida margaritas quero, nec quos thynica lima perpolibit anu-los nec Iassius capillos.

Hos versus cuiuscumque sunt: nam Flaccus ille qui laudatur irrebsit ex ipsis versibus, & propè est vt cum viro docto C. Cilnij Mæcenatis in Horatium esse credam: sed cuius cuius sunt, ita emaculatos à me non pessimè arbitror:

*Lugens te, mea vita, nec smaragdos,
Beryllos neque, Flacce, nec nitentes
Semper candida quero margaritas
Nec quos Thynica lima perpoliuit
Anellos, nec Iassios lapillos.*

Notus mos Romanorum ponendi in luctu anulos venustissimè tangitur: hoc animaduerso sententia non obscura est. Margaritæ nitentes semper candi-da, sunt candidæ, vt Virgilius dixit, *Crebra ferit*, pro crebrò. Bithyniam olim dictam Thyniam, notum ex multis auctorum locis. verius tamen fortasse sit, ita partem duntaxat eius nominatam, cui rei au-ctor Ammiânus, qui libro x x i i. in Mariandem & Thyniam eam distributam memoriæ pro-didit.

CAPVT VI.

Obferere beneficia, pugnòs. Serere fallaciam. Bitere & bitare. Attij fragmenta aliquot correctà, & Plautus Pœnulo.

L. A T T I I principis Latinæ tragœdiæ fragmenta quædam, apud Nonium corrupta, hoc capite, quod potero, redintegrabo.

In Fors & Fortuna.

Attius Andromeda. Multi iniquo mulier animo sibi mala auferre in malis, quibus natura praua magis, quàm fors aut fortuna obfuit.

Vnius verbi vitio labat sententia. pro auferre ms. agnoscit, *auferre*: idque rectum est. Ausi & auxi, vt ninsi & ninxi promiscuè vetustissimi: quare hæc in septenarios recolligo:

Multi iniquo, mulier, animo sibi mala auxere in malis,

Quis natura praua magis quàm fors aut fortuna obfuit.

Frudita sententia est, & quæ non longè abit ab Heracleti illo, ἡ δὲ ἀνδρῶν τε δαίμων.

In Seges:

Idem Andromeda. Quod beneficium haud in sterili segete te obesse intellegis.

Iunius tentat legere, locasse: ego præstare audeo verum esse, *obesse*. Obferere beneficia, peruenustum est. variè enim transfertur id verbum. Plauti Menæchmis aliò:

Hisce ego nunc semetem in ore faciã, pugnòsque obferam.

Ita Pœnulo serere lites dixit, & serere fallaciam. sic enim lego hos versus, Scena prima.

Abeamus intrò, vt Colabiscum villicum

Hanc perdoceamus vt serat fallaciam.

Vulgarij libri omnes, *serat*. inficetè. At nostrum illud præterquam quòd vsitatissimum loquendi genus,

etiam iocum ex ambiguo, more Plauti, captat. de villico enim sermo est.

In Gracilitudo.

Attius Amphitruone. Tamen ista tua gracilitudo & luctus facit, ne dubitem.

Lego, *ne diu bitem.* Bitere & bitare veteribus fuisse quod nobis ire, nemo nisi fungus in his litteris iam nescit. Quia, inquit, imbecillè te video quâ ab animo quâ à corpore non defetigabo amplius multa itione.

In Specis.

Attius Alcmaeone. Quod dii interdum inferum penitus depressum altis clausere specis.

Suspisor anapæsticos fuisse, itaque rectè à me emaculatos:

Quod dii interdum inferum penitus

Depressum altis clausere specis.

Scio enim descensiones istas heroum ad inferos sole occaso semper fuisse, reditusq. ante eundem ortum.

CAPVT VII.

Tubuli. Animi angî. Pretio vincere. Cicero Verrinis aliquantis locis emendatus.

M. TVLLII his libris pauca admodum attingere decreui. alterius enim erit & temporis & loci, studiosis harum litterarum impertiri ea, quæ in optimum hunc linguæ Latinæ parentem notata habeo. Lubet tamen interspergere nonnulla quæ gustum quemdam ceterorum exhibeant: sic nimirum, ut cum

———*ficos propola recentes*

Protulit, & pretio ingenti dat primitu' paucos.

Libro accusationum quarto acerbè & grauiter infectatur scelus Verris, qui suam in iudicando fidem &

reos & auctori flagitiosissimè pecunia addidisset. *Quem*, inquit, *michi tu Bulbum, quem Stalenum, quod vniquam huiusmodi monstrum aut prodigiū aut audiuius aut vidimus, qui cum reo transigat, post cum accusatore decidat?* In quibus verbis quem dicat Bulbum nescio, ac mea sententia ne alij quidem vlli; nihilque certius est lectione libri veteris, quem mecum communicauit vir clarissimus Io. Metellus, *Quem mihi Tubulum.* Eiusdem pro Scauro meminit, apud Asconium. *Si mehercule, Iudices, pro L. Tubulo dicerem, quem ex omni memoria sceleratissimum & audacissimum fuisse accepimus.* Fuerunt ij Tubuli gentis Hostiliæ, & mentio est, si quid fortè hoc ad rem, C. Hostilij Tubuli propratoris apud Liuium libro xxi.

Ibidem paucis interiectis.

Qua posteaquam iste omnia abstulit alia rogando, alia poscendo, alia sumendo, ferebat Stenius vt poterat,angebatur tamen animi dolore necessario.

Conatus huic loco mederi Lambinus, etiam magis corruptit: sed venustissimè idem liber, *angebatur animi necessario.* Sic Epidico Plautus: *Absurdè facis qui angas te animi.* Et eadem fabula, *excruciari animi, desipere mentis, sermonis falli*, idem dixit.

Aliquanto inferius:

Quicumque senator voluerit fieri quamuis puer, quamuis indignus, quamuis ex eo loco ex quo non liceret: si is pretio apud istum fieret idoneus, vt vinceret, factum esse semper.

Et hic locus glossemate inquinatus, in ms. erat, *si is pretio apud istum idoneus vinceret.* Idoneus ἀρξικῶς pro idoneos. hoc mutato constitutus locus est: ita paullo infra: *Fit vt pretio nouus vincat, litterasque à pratore auferat.* Curculione Plautus:

Si amas,

Si amas, eme, ne roges: facito vti pretio peruincas tuo.

Aliquanto pòst:

Is quod videbat istius censum stare nullo modo posse, eum censum obseruare iussit.

Liber scriptus, istius census stari. Scribo litterula detracta, censu stari: hoc est, in istius censu perseuerari. pro Flacco: Prætor actionem se daturum negauit: re iudicata stari ostendit placere.

CAPVT IIX.

Vita familiaris. Lubens. Lubentia. Plauti Persa duum locorum restitutio.

SCÆNA, Omnem rem inueni.

Mærsupium habeat, mihi paullum praesidi,

Qui familiarem suam vitam oblectet modo.

Lego, oblectet domi. Familiarem vitam eam ait, quam domi à nemine vocatus agat: ita parasitus Captiuus:

Neque vnquam quidquam me iuuat, quod edo domi,

Foris aliquantillum etiam quod gusto id beat.

Eadem Persa, Scæna Hostibus victis.

Statuite heic lectulos, ponite heic quæ assolent: heic statui volo primum aquulam mihi

Vnde ego omnis hilares, ludentis, letificantis faciã ut fiant.

Quorum opera hæc mihi facilia factu facta sunt, quæ volui effici.

Nam improbus est homo, qui beneficium scit sumere & reddere nescit.

Lepidissimi, ita me Musæ ament, versus; sed perobscurus ex iis secundus, ob insolentiam formulæ, faciã hilares ut fiant; elegantis tamen, & in vno Plauto locis sexcentis obuiæ, accusandi casu pro nominandi posito. Nos exemplo vno contenti erimus; Epidico:

Si in-

Si inuenio, exitiabilem ego illi faciam hunc vt fiat diem.
 Hoc primùm noto: tum leue ex eo mendum tollo.
 Pro *ludentis* enim reponendum haud dubiè, *lubentis*:
 quod conuiuij verbum proprium est, cùm frōte iam
 exporrecta iocandi & sese exhilarandi cuique lubido
 est. Adelphis Terentius:

Hilarem ac lubentem fac te in nati nuptiis.

Inde Gellio *lubentia* conuiuiorum sunt laetitiae, &
 quæ vltro citro reciprocant inuitationes. lib. x v.
 cap. ii.

Cui lubentia gratiaq; omnes conuiuiorum incognita sunt.
 Apuleius de Asino primo: *Lectulo refoueo, cibo satio,*
poculo mulceo; iam ad lubentiam procliuus est ioci & scitum
est cauillum. Hinc *lubentes* pro *lætis* & *hilaris*, & ipsa
hilaritas lubentia dicitur, *Asinaria*:

Vbi ego nunc Libanum requiram aut familiarem filium;

Vt ego illos lubentiores faciam quàm lubentia est.

Et Sticho. *Itaque onustum pectus porto letitia lubentiaq.*
Cetera, vt arbitror, bene habent: hac totius loci sen-
tentia. iubet Toxilus lectulos statui, cyathos, vinum,
cetera quæ assolent, inprimis caldam temperando vi-
no adponi: vt lubentia & hilaritate impleat omnes,
quorum opera fallacia ex sententia successerint. pla-
cere enim sibi, vulgò quod dicitur, ingrato nihil
quidquam esse improbius.

CAPVT IX.

Truones. Silus. In Festo pauca animaduersa.

A P V D Festum in voce Stolidus versus Ennij
 publicatur:

Nam vidi pugnare suas stolidi soliti sunt.

Vbi in mss. fuisse viri docti indicant, *vide*. Diuisa vo-
 cere-

ce restituo: Nam vi depugnare. Apud eundem Sentes.

Afranius Abducta. Quam senticosa verba pertorquet turba.
Mutant viri docti in, lupa: ego propius scripturæ veteris ductum, pertorquet truo. Truones vulgi scomma in enormis nasi homines. Cæcilius:

Prò dij immortales! vnde prorebit truo?

In Silus.

Silus appellatur naso sursum versus repando.

Malo lectionem libri scripti Colonienfis, *nasus sursum versus & repandus*. A filo enim denominati filones, vt à naso nasones, à mento mentones, à dorso dorsones.

CAPVT X.

Videri scribendum saltim, non, vt vulgo, saltem. Illustratus Gellius libro xii. cap. xiiii.

QVÆRIT scriptor Atticarum Noctium de significatione & origine particulæ **SALTEM**, & recenset ille quidem duas opiniones hominum, vt apparet, ingeniosorum: sed idem tamen argutias istas acutas quam veri similes iudicat, pronuntiatque amplius. Ea de re vt certi quid statuere & diffinire, temerarium; ita fortè non reprehendendum, sententiam meam timidè & verecundè ostèdere, iudicium relinquere doctioribus. Semper enim ita existimaui, errore fieri peruulgato & hoc tempore; vt sic dixerim; catholico, quòd id verbi secunda vocali & scribatur & pronuncietur: cùm recta & legitima scriptura videatur esse per tertiam. Auctores habeo libros manu descriptos, è quibz optimus quisque & vetustissimus agnoscit, **SALTIM**: nonnulli etiam inductum & repositum quod nunc terimus habet. mihi sic vsu venit; neque dubito quin & aliis. Deinde
ex hoc

ex hoc analogiam eruebam; ex illa significationem. vt enim à supinis raptu, cursu, sensu, recessu; raptim, cursim, sensim, recessim: eodem planè modo descendit à saltu, saltim: & vt in illis primigenia significandi vis residet; ita eadem in hoc non obscura est. Adhibetur enim in oratione, cùm ea quasi saltu quodam ab iis quæ antecesserunt subito præcipitat, & finit in extremum aliquod. Parcā adscribere exempla. sunt enim sexcenta tanta in promptu, neque in iis vllum, in quo non hæc transiliendi siue transiionis, vt Rhetores loquuntur, vis eluceat. Quod si quis neque libris acquiescit, nec Etymologiæ concinnitati, at ille Priscianum saltim audiat: qui enumerans aduerbia in E M verbum de hoc nullū, postea subdit. In I M & denominatiua inueniuntur & verbalia & participialia: vt à parte partim, à viro viritim, à vice vicissim, à statu statim, à raptu raptim, à saltu saltim & saltuatim. Vbi quin intellegat, quod nos vulgamus S A L T E M, dubitare nos res non patitur. Qui vetustatem obiiciet scripturæ iam inde à Gellij ætate usitata, sciat iam tum pleramque maiorum consuetudinem quā scribēdi quā loquēdi mutauisse, id quod vel ex ipso colligere est: viderique eius addubitatione errorem inualuisse, cùm, quod ille hesitanter posuerat, Grammatici temere sequerentur. indicio est Donatus, siue quis alius est in Adelphos Terentij: *Saltem, inquit, τὸ ἐξαπὸν. natum est autem à captiuis, saltem, qui nihil aliud præter salutem à victore petunt.* haud dubiò ex Gellij loco. Hac in sententia magis confirmatus sum, postquam probari eam sibi mihi significauit eruditissimus amicus meus Fr. Modius; qui etiam P. Pithæum ita in suis libris perscriptam hanc vocem repperisse, ostenso eius ad Sidonium Apollinarem

narem loco, me docuit. Si quis tamen melius quid attulerit, cum libens meritò sequar.

CAPVT XI.

Pergula. Creta in toga candidati. In sipare. Padidum. Pomponius apud Nonium restitutus pluries.

ARCESSAMVS Pomponium quoque ad has *κρίσεις & ἰάσεις* nostras, & malè accepto ei à mutilatore Nonio si quid in nobis opis est ne denegemus. Primum, quod adducitur in Suppilare:

Pompon. Sarcul. Alteram apportat, prodigit, patrem suppilat semper.

Haud dubiè rectè emaculo, *Alter amat, potat. Origo mendi è distractione syllabarum, Alteram alpotat.*

In Taxim:

Pompon. Buccon. Clandestino tacitus taximi perspectavi per cantum.

Iunius in MS. inuenit, *perspectavi periculum. Emendo, perculam. Percula siue pergula, vt Glossæ explicant, ὑπερώων στερόν οὐκηναι.* Plinius xxi. 111. L. Fulvius argentarius bello Punico secundo, cum corona rosacea interdum è pergula sua prospexisse dictus, ex auctoritate senatus in carcerem ductus non ante finem belli emissus est.

In Ominas.

Pomponius Cretula. Nil petitura bene eueniat. Ita sit, & tibi bene sit, qui rectè ominas.

Editio vetus Veneta, *Cretula vel petitura. Scribo, & meo quidem animo verissimè, vel Petitore. Scripsit hanc fabulam, vt è titulo colligo, de candidato magistratum ambiente: ideò Petitorem inscripsit, quod peti magistratus propriè dicitur; & Cretulam, quod qui petebant creta togas suas candefaciebant, vnde candi-*

candidati ducta appellatio est. Præterea cognomine hanc distinguere voluit ab illa, quæ *Petitor Heres* inscribitur. Iam sententia fragmenti clara est, esse verba bene precantis candidato, & illius respondentis.

In Feruit.

Pompon. Fullone. Facite vt ignis feruat, ligna insipite, far concidite.

Rectum est, *insipite*. Insipare est iniicere: vt obsipare, obiicere & aggerere. Plautus: *Obsipat aquulam*. Vt autem sonare, sonere; tonare, tonere: ita insipare, insipere promiscuè inflectebant. Pomponius alibi: *Partem insipui, conclusi, condepsum*.

In Intybos.

Pompon. Placent a. Rustici edunt libenter pedibus tristes, acres intybos.

Scribo, *padidos, tristes*. *Padidum* quod foetet & grauis odoris est, vt omnes nôrunt.

C A P V T XII.

Notatum prouerbium, Ossa atque pellis. tum Virgilius, Ouidius, Plautus emendati.

P. VIRGILII versum Bucolico tertio libri publici ad vnum omnes ita legunt:

His certè neque amor caussa est vix ossibus herent.

à sententia non multum, à verborum & interpunctionis venustate abductum longulè. Scribo enim:

His certè (neque amor caussa est) vix ossibus herent.

Auctor mihi perspicuis verbis in Terētij Eunuchum *act. 2. v. 2.*

Donatus: *Hi hice, his hisce, nominandi casu numero multitudinis promiscuè vsurpabant.* His ergo hoc loco hi est.

Postea trita Latinis auribus formula est, *amor caussa est*. Et sic Cicero Lælio: *Valetudinem caussa non mæsti-*

B

tiam

tiam fuisse. Et reducit hic versus mihi alterum in memoriam P. Nasonis non dissimilis sententiæ:

Si patet est, l'enerisimilis; si flaua, Minerva;

Sit græuilis, macie quæ malè visa sua est.

Emendo versu posteriore *macie quæ malè visa sua est.*
Vtenim Maro, vix herere ossibus; ita hîc Naso, malè niti macie siue macilenta cute dixisse videtur, siue potius, nisi me meum fallit somnium, dixit; de ea, quæ, vt vetus verbum est, *ossa atque pellis tota esset.* Vetus verbum dico, quod *περὶ τοῦ σώματος* iactatum id fuisse in macilentos è Plauti locis duobus colligebam.
Captiueis: *se. Minus aniam*

Macesco, confenesco, & tabesco miser,

Ossa atque pellis sum miser à macritudine.

Ira rectè ms. Langij: malè vulgo *miseria macritudine.*

Aulularia: *se. Minus laboris*

Volo ego ex te scire, qui sit agnus curio.

E V. Qui ossa atque pellis totu'st, ita cura macet,

Quin extra inspicere in sole etiam viuio licet,

Ita ut pellucet quasi laterna Pœnica.

CAPVT XIIII.

Notatum item prouerbiū, *Vipera est in veprecula. Cacabus.*

Illustratus Virgilius, & Cicero pro Sextio.

EODEM Bucolico leguntur hæc ab omnibus:

Qui legitis flores & humi nascentia fraga

Frigidus, ô pueri fugite hinc, latet anguis in herba.

neque tamen occultius quidquam subesse vlli interpretum suspicati sunt. Mihi numquam dubium fuit, quin poëta ad parœmiam quamdam respexerit, & fortassean eam qua vulgò ferebant, viperam esse in veprecula: de periculo graui & inopinato. Eum
adagio-

adagionem apertè extulit Pomponius: *apud Horatium in Vepres*

Dide, cedo cacatum. vipera est in veprecula.

Prima verba videntur mendosa, & conabar legere, *Dide, cedo cacabum.* Cacabus enim vas in quo pulmentarium coquitur: sed abstineo. Respexisse autem huc Virgilium vincit, quod fragorum meminit, quæ in vepretis ferè leguntur. Significat idem verbum M. Tullius pro P. Sextio: *Quoniam id etiam fatum ciuitatis fuit, ut illa ex vepretis extracta nitedula remp. arroderet.* E re nata mutauit argutissimè. nam sic cum audiretur, vipera è veprecula, de eo qui & vehementer noceri posset, & de improviso, cauerique idèd vix posset: ille nitedulam ex vepretis appellat, qui nocere velit magis quàm possit, cauerique non magnopere debeat.

CAPVT XIV.

Votitus. Tamenetsi. Nullus pro non. Casina prologo versus, item alter ipsa in fabula restitutus & Terentius Andria.

CASINÆ Plauti qui præponitur prologus elegans mehercule & perurbanus est, dignusque qui eo loco legatur. in eo versus hic in libris paulò vetustioribus omnibus ita concipitur:

Aures votiuæ si sunt, animum aduertite.

Primus Lambinus, ut nos credere vult, illud *votiuas* parum huc conuenire animaduertit, mutauitque in *vaciuas*, ad exemplum illud Plauti Pseudolo:

Faxis vaciuas Pseudole adis aurium

Mea ut migrare dicta possint quòd volo.

à quo dissentio. Neque enim, ut heic quidem usurpatur, iocus acuti quidquàm habet, ut illo quem modò posui loco, adductis quæ ad eandem translationem faciunt aliis. & quorsus tandem si aures vaciuas

habeant non eas aduertere iubet, sed animum; quasi pænitéret verborum antecedentium. Itaque vide ne verius sit:

Aures votita si sunt animum aduertite.

Votitus qui voto quo minus quid faciat impeditur. Asinaria:

Nolo habere illam causam & votitam dicere.

Lepidè igitur histrio: si, inquit, voto tenemini quo minus auribus mea dicta vsurpetis, at vos animo ea vsurpate. Lufit nimirum in eo, quod immobiles homini natura aures dedit, vt ex aduertere non possint: at animum aduertere vulgatissimum loquendi genus. hoc igitur agere eos iubet.

Eadem fabula, Scæna Si sapitis.

Qui amat tamen hercle si esurit nullum esurit.

Immuto leuiter, sed, quod ausim præstare, verò:

Qui amat tamen hercle etsi esurit, nullus esurit.

Tamenetsi probum & antiquæ notæ verbum hîc in tmesi cùm esset, propè euauit. Id reponendum etiam in Terentio, Andria: Nihil audio

Ego te commotum redidam. DA. tamenetsi hoc verum est.

Ita enim optimum fragmentum Colonienfe, quod in æde maxima adseruatur. Nullus esurit, pro non esurit notum loquendi genus. Pomponius: Lapathium nullus vescebat, lardum lurcabat libens.

CAPVT XV.

Patroni duo fragmenta composita. eiusdem Modij argumentum, & eandem sententia adducta expressa de Plauto.

VERE hoc vulgo dicitur εἴματ' ἀνὴρ, meritòque doctissimi viri semper monuerunt, fugiendam in vestitu ineptam leuitatem. in iis togatorum eruditissimus

mus Varro, cuius super hac re sententiam, quæ Meleagris eius heferat, ex Nonij duobus locis à me com-
positam huc adscribam: *in Apertis
et Demissam*

*Non modò furis apertis, sed penè natibus apertis ambulas:
cùm etiam Thais Menandri tunicam habeat ad talos
demissam.*

Notat schema vestitus nostro seculo non insolens: ubi & hoc noto, vidèri politissimum virum more suo alludere ad locum poëtæ veteris æqualis sui, certè non multo maioris Turpilij, ex cuius Demiurgo hæc adferuntur: *in Apertis*

*Apertæ suræ, brachia autem procera horrorem mihi
Ex corde exsuscitabant.*

Verba sunt, vt apparet, puellæ fastidientis in proco & corpore enormi & deformi habitu. Itaq. sibi eas nuptias odio ac senio esse ait, vt ex eadem hac fabula citat Nonius. Eadem de caussa scribserat Modium, *in Angi-
tur* quo, vti ex fragmentis intelligimus, in victu & vestitu reprehendit vtrumque τὸ πλέοντε καὶ τὸ ἐλαπτον; probauit, id quod titulus docet, τὴν μεσότητα. Modius enim ipsi planè id est, quod Græcis τὸ μέσον, M. Tulio mediocritas quæ inter nimium & parum est. In quo libro præter cetera memorabile illud & tamquam è tripode Apollinis oraculum; non eos optumè vixisse, qui diutissimè vixent, sed qui modestissimè, id est modicè. Quis verbis postremis ad Plauti, vt solet, alusit, Persa:

Modicè & modestè melius vitam viuere.

CAPVT XVI.

Euripidis Medea locus emendatus, & cum simili Ciceronis compositus.

EURIPIDIS Medea primore statim fabula ita



alloquitur puerorum regionum magister eorundem
alumnarum animum.

τίς δ' ἔχει θνητῶν; ἄρτι γνώσεις τόδε
ὅς πᾶς τις αὐτὸν τῷ πέλας μάλλον φιλεῖ.

Cum illa quæstio esset Iasonem benivolentiæ & pietatis in suos parum meminisse; subiiciens hic, quis tandem, inquit, non idem facit? iam intellegis verum esse vulgò quod dici solet,

Omnes sibi esse melius malle, quàm alteri.

Sic enim versum posteriorem interpretatus est Terentius, ut rectè vidit eruditissimus Victorius: idemque præclare priorem ita ut nos scribimus laudat, à scholiaste admonitus, cum vulgò aliter legatur. Subiicit deinde ille apud Euripidem causarum quasi contentionem, quibus inducti amicos sibi plerique postponant:

οἱ μὲν δικαίως, οἱ δὲ καὶ κέρδους χάριν,
εἰ τὲςδε γ' οὐκ ὄντως οὐνεκ' ἐς ἔργει πατὴρ.

Quorum versuum priore difficile est ut depellat de sententia iamdudum suscepta, legendum videri, οἱ μὲν διὰ κλέος. Primum vicinitatem litterarum mihi quis cōsideret, & is maximè qui librorum & compendia & ductum ex libris manuscriptis novit: tum ipsam rē putet. Hoc enim, opinor, vulgata lectio sonat, minùs multos quàm debet amare, partim iustè, partim avaritia impulsos. quod & falsum & ineptum est. Falsum, quia si philosophos audias, vix unquàm te magis amabis amico, ut ius amicitiae non migres. ineptum; quod potius opponendi fuissent ij qui iniustè defererent amicos, iis qui iustè; quàm qui avariter. At nostrum hoc quod reponimus huic loco aptissimum. alij, inquit, ambitione acti se amicis antepo-
nunt,

nunt, nonnulli etiam turpis lucri cupidine: ne tu id tam iniquè feras, si tui amoris causa pater liberos neglegit. Ponit eadem M. Tullius Lælius, ut quosdam scopulos, ad quos multæ multorum amicitia faciant naufragium. Sin autem ad adolescentiam perduxissent, dirimi tamen interdum contentione vel uxoria conditionis, vel commodi alicuius quod idein uterque adipisci non posset. quod si qui longius in amicitia prouecti essent, tamen sæpè labefactari, si in honoris contentione incidissent. Quem ad hunc ipsum Euripidis locum respexisse valde suspicor: ita eadem omnia utrobique posita, quæ beniuolentiæ rescindenda sint, ambitio, auaritia, uxoria condicio.

CAPVT XVII.

Paccuij versus aliquot compositi de coniectura, & correcti.

NONIVS in Senium ex Paccuij Peribæa hæc adducit:

Parum est quod te ætas malè habet, ni etiam hic ad malam ætatem cruciatum adiungas reticenti.

Hic nemo non videt, mediocriter doctus saltem, litterulam fugitiuam vocis postremæ reprehendendam, ut fiat, *reticenti*. Illud fortasse non item, videri hæc adhesisse aliis aliquot versibus, quos malè diuulsos ex Nonij locis quattuor ita compello, ut sic dicam, iterum & compono.

SE. *Lapit cor cura, ærumna corpus conficit.*

N. *Parum est, quod te ætas malè habet, ni etiam hic ad malam.*

Ætatem cruciatum adiungas reticentiæ?

Ecfare, quæ cor tuum timiditas territat?

SE. *Mane, expedibo actutū: ibi quod cōtrā rogo Respōdeas.*

Certè sententia examussim quadrat, & vt non ita olim coheserint, vtilius tamen heic legentur coniunctè, quàm diuulsè apud Nonium, in Senium, Lapidem, Timor, Expedibo.

Idem, Accusatiuus pro Genitiuo.

Pacuius Peribœa. Regnum imperator, æternum morum sator.

Lego, *Regum imperator, æternum mœrum sator.* Mœrus pro murus iam tralatitium. Est precationis ad Iouem initium; vt liquet ex his quæ ab eodem Grammatico conseruata non longè à superioribus hesisse videntur:

——— *veniam precor,*

Petens, vt quæ egi, ago, axim verruncem benè.

Vicem mantissæ, vt antiqui loquebantur, adiciam, ad hæc Pacuuij quæ ex eodem dramate laudantur à Nonio:

Nam me perbitered, illis opitularier

Quouis exitio cupio, dum prosim modò.

vidèri respexisse Terentiũ, cùm illa scriberet Andria:

Ego Pamphile hoc tibi pro seruitio debeo,

Conari manibus pedibus noctesque & dies,

Capitis periculum adire, dum prosim tibi.

CAPVT XIIIX.

Vocare. Vocationes. Emendatus Eunucho Terentius bis, Stichus Plautus semel.

TERENTII Eunucho quod vulgatur;

Te mihi patronam cupio Thais, te obsecro.

rextius in mss. est, & libris melioribus, *capio*. Vetus enim mos Romanorum tangitur. è plebe homines instituto Romuli, quos vellent è patricijs patronos capie-

capiebant; quorum præsidio & opibus tuti essent: neque fas erat à patrono clientem deserui. auctor Dionysius historiarum secundo. Vel igitur huc respexit, vel vrbanius etiam Chærea patronā capit tamquam nouus libertus eius, cuius se paullò antè seruum gesserat.

Eadem fabula:

act. 5. sc. 4

Quæ cum amatore suo cùm canant, ligurriunt,

Harum vidēre inluuiem, sordes, inopiam.

Et heic verissimè fragmentum Colonienſe, *Quæ quom amatores vocant, ligurriunt.* Vocare Latinè dici, quod nos vulgò inuitare notū est. in eo emendandus Plautus Stichus: *u. Quæcunq*

Sed generi nostro hæc reddita est benignitas,

Nulli negare soleo, si quis me vocat.

Libri omnes, *si quis me esum vocat*: sed istud, *esum*, irrebſiſſe è glossa vel versus arguit, cui nequiquam mēdēri conatus est Lambinus. Hinc Catullo vocationes:

Vos conuiuia lautiora leti

De die facitis, mei sodales

Querunt in triuio vocationes.

Eademque Iustino lib. x x x v i i. Hieme deinde imminente non in conuiuio sed in campo, non in vocationibus sed in exercitationibus, nec inter sodales sed inter aequales aut equo ut cursu aut viribus contendebat. Ita enim isthic legentum amicissimus mihi, flos Germaniæ, Palmerius me monuit, cùm publicetur ineptè vacationibus aut duocationibus. Neque verò in loco Terentij me moent, mutili isti centones, qui Donati nomen præferunt quòd dissentire videntur. Quis enim non videt eptissima illis sæpe à nescio qua mala manu adſuta? hîc quidem lectionem vulgatā interpretationem e eius, quod ego reposui. Neque versus lababit,

si τὸ quom neque elices & produces: more veterum, qui & consonandi D syllabæ extendēdæ adiiciebant.

CAPVT XIX.

Aucupare. Quo pro quod. Threces. M. Varro De lingua Latina quarto libro correctus: item Cæcilius.

ERVDITE M. Varro, ut omnia, libro De lingua Latina quarto, verborum origines ait aut vulgarias esse & populo quoque non planè incognitas; aut Grammaticas, quæ occultiores; aut denique philosophicas & Stoicas, quo difficillima atque ad eò vix perueniri possit. Itaque se ex opinione magis quàm certa scientia de iis traditurum profitetur. *Quartus*, inquit, *vbi aditius & initia, regis: quo si nō perueniam scientiam ad opinionem aucupabor. quod etiam nonnumquam in salute nostra facit cū agrotamus medicus.* Vbi sententia multò illustrior & fortean locus constitutus erit, si legeris: *quo si non peruenero scientia, at opinione aucupabor.* Mendi occasio fuit in A D quarta littera per scripto. Aucupari aliquid pro inuestigare Latinis vstitutissimum. Plantus Milite:

Arin. 67. Viden tu illum oculis venaturam facere atque aucupium auribus?

Ita Cæcilio aucupari argētum, est anquirere & in inueniundo eo satagere. Sic enim lego ἀπραζόμενη apud Donatum in Eunuchum Terentij: *act. 4. 117*

——— *Quid tibi aucupatio est*

Argentum? aut de meo amore verbificatio

Patri.

malè vulgò, *argumentum*. Sensisse autem quod posuimus Varronem indicant quæ non multò pòst sequuntur: *De nostris dicam, cur sint: de alienis, unde sint; de obli-*

de obliuio relinquam. quorum partim, quò ita inuenerim, ita relinquam, scribam. Sic enim ex mss. isthic scribendum, & quò positum pro quod: idque sæpius quàm quisquam suspicatus hætenus est, factum nos alibi docemus. Eodem Varronis libro Ennij versus laudatur:

O terra trita, vbi Liberi fanum in ciuium muro locaui.

mendosè, quis non videt? sed corrigendum censco:

O terra Threca, vbi Liberi fanum inclutum locaui.

Prius à libris, & notum est *Threcas* in mss. esse, quos nos malè mea sententia *Thracas* vulgamus: alterum ex eorundem vestigiis: habent enim, *in ciuium*. vnde factum, vt alij sententiæ supplendæ adiecerint, *muro*: quod hîc tam conuenit, quàm in tragædia foccus. At constat religiosissimè Bacchi orgia apud Threcas celebrata, eaque de re pleni veterum libri, ne à me exempla expectes.

CAPVT XX.

Præsidium pro viatico. Emendata Plauti Pænulus.

PLAUTI Pænulo in illa affabrè adornata fallacia, qua leno in plagas Agorastoclis compulsus est, hi versus leguntur. Scæna, iam isthuc ego reuortar.

Immo vt ipse nobis dixit, quo accures magis,

Trecentos numos Philippeos portat, præ sibi.

De subornato illo Spartiata sermo est, quem aiunt vnde nequam faciat aurum habere. Sed inibi quid sibi volunt obsecro ista, *præ sibi*? nam ego quidem iuxta cum ignarissimis scio. Vide tamen si commodè in mentem venit, malè dissiluisse syllabas, scribendumque esse:

Trecentos numos Philippeos portat præsidij.

Præsidium eleganter pro commeatu siue viatico posuit,

fuit, quod fami arcendæ sit: vt & Sticho:

*Cynicum esse egentem oportet parasitum probè
Ampullam, strigilem, scaphium, soccos, pallium
Marsupium habeat, inibi paullum præsidij,
Qui familiarem suam vitam oblectet domi.*

Portare igitur numos præsidij, est in comeatum & sumtum secum ferre. Eadem fabula, Scæna Satyris spectatum est.

*Ibo intrò, hac vt meo hero memorem. nam hic si ante
adis seuocem.*

Corrige, ante adis euocem. Paucis post versibus:

*Nam & hoc nocte consulendū, quod modò concreditū est.
Mirum, fugisse plerosque leuissimum mendum: lege,
Nam & hoc doctè consulendum. Nihil huc nox facit,
& docta consilia, docta dicta, docti doli, semper Comi-
cicis in ore & sermonibus.*

CAPVT XXI.

Pecua præcia. Præcia. Species luminis. Specere. Attij fragmenta multoties emaculata apud Nonium.

E naufragio scriptorū L. Attij quasi tabulas quasdam collegenti mihi in manus venerunt vitiosæ quædam & hiantes, quas refarcire conatus sum, bene an secus alij viderint.

Nonius in Pecua.

Attius Diomede. Passim qua præda pecua balabant agris.
Fortassean corrigendum, *Passimq; præcia pecua.* Præcia à præciendo, quòd clamore & balatu pastorem antecedant, certè eodem modo Præciæ dicti tamquam proclamatores quidam, qui Flamines antecede-
debant, & clamore opus fieri prohibebant: de quibus vide Festum.

In No-

In Nobilis.

Att. Diom. Me Argos referam, nam hic suam nobilis, ne cui cognoscar noto.

È Festo & litterarum ductu restituo, Ego me Argos referam. nam hic cluo iam gnobilis. In Insolens.

Attius Diom. Ita è fletu & tenebris obstinatus speciem amisi luminis Conspiciunt insolentiam.

Propius germanam scripturam editio Nonij vetus Veneta; è qua, eiecto dumtaxat E, scribo: Ita fletu & tenebris obstinatus speciem amisi luminis. Speciem luminis dixit pereleganter pro visu. Specere enim & spicere antiquè vidère est. In Exanclare:

Attius Diom. Ferè exanclauimus tyranni ingenium sanuum & execrabile.

scribendum, Feri: vt ad tyrannum referatur.

In Caussari.

Attius Medea. Qui potis est repelliquisquam, vbi nullus est caussandi locus.

verum est, refelli, arguta sententia. Nemo, ait, conuincitur, cui sui purgandi potestas non datur.

In Tabificabile.

Attius Medea. Par neci orbificor liberorum letho & tabificabili.

emendo, Pernici orbificor. In Aucupauì.

Idem Medea. Ego me extollo in abietem, altè ex tuto prospectans aucupo.

rectius esse opinor, prospectum aucupo. Exemplum supra posui, & alia vbique obuia. cap. 19.

CAPVT XXII.

Qui aduersa. Ilj. Addubitatum de Plauti versu Bacchidibus: alius indidem emendatus.

SCÆNA, Iamdudum Pistoclère.

Quo nunc capeſſis tete hinc aduerſa via

Cum tanta pompa?

An hîc aduerſa via, quam infelicitè & diis tuis iratis ingreſſus ſis? an verius eſt, *auerſa via*. Vt ſignificet, quod explicauit pluribus *Aſinaria*, ſic:

—— *hac quidem non venit, angiporto*

Illac per hortum circuit clam, ne qui ſe videret.

Sed inclinât animus credere, fuiſſe olim:

Quo nunc capeſſis teted hinc aduerſa aui.

ob ea quæ antecedunt: ea verò quæ publicantur fulciendo verſui videntur excogitata. Aduerſa auiſ eſt altera & ominis mali. Poëta vetus apud Ciceronem:

Soluere imperat ſecundo rumore atque aduerſa aui.

Scæna, Attidæ duo.

In dolis ego deprenſus ſum, ille mendicans penè inuentus interiit.

Dum ibi exquirat fata illorum. aſimiliter mihi hodie obtrigit.

Res eſt non coniectura, *fata Iliorum*. Ilij pro Ilienſibus de quòrum fatiſ hîc agit. Sic poëta nescio quiſ, *Ilius Hec̃tor*.

C A P V T X X I I I.

Mos antiquus in nuptiis. Mutinus Tritinus. Mutinum, Mutio. Mutoniatus. Præſidère. Correctus Lactantius, & locis duobus Lucillius.

MIRA ſuperſtitio fuit veterum in omnium rerum primitiis diis ſuiſ conſecrandiſ. Et vide ſodes ineptiaſ, & ride. etiam noua nupta, priuſ quàm ad maritum deduceretur, obſcæni Dei in ſinum locabatur; vt hic quoque iure ſuo pudicitiam eiſ prælibandi

bandi frustrari ne videretur: auctor Lactantius di-
 uinarum Institutionum primo. *Et Tutinus, in cuius cap. 20*
sinu pudendo nubentes praesident, ut earum pudicitiam prior
deus praebuisse videatur. Emendo, *Mutinus*, siue *mauis*,
Tutinus. Tutinus deus quod equidem sciam necdum
 natus est, & nihil huc facit siue Tutilinus siue Tu-
 tanus, quâs tuendi nostri, si credimus, cura est. Mu-
 tinus autem Latio, qui Græciæ Priapus, teste Diuo
 Augustino: idemque Festo Mutinus Titinus dici-
 tur. Faciebant illi sacra velatae, vnde nuptæ dicun-
 tur; & in togis prætextis, vnde, quia dum porro ita
 deducerentur ad maritum acclamabantur fescenni-
 ni. in dicterium abierunt verba nupta & prætextata
 pro liberis & obscænis. Ab hoc Mutino & in nobis
 id quo sumus mutinum dicimus, & mutones siue
 mutoniatos bene vasatos, & quibus peculium, istud
 dico virile, calamitas non attigit. Manavit exinde la-
 tius, ut iaceretur in quemuis impurum. Lucillius:

Et mutoni' manum perscribere posse tagacem.

Idem verbum reponendum Iulpicor duobus eius-
 dem Lucillij locis apud Nonium. primum in Se-
 nium:

In numero quorum nunc primu' Trebelliu' multo

Obmarcescebat, febris, senium, vomitus, pus.

malum. *Trebelliu' muto.* quamquam vulgatum illud
 defendi posse non negem: ut & in Nebulo:

Nugator quidam ac nebulo sit maximu' multo.

Legebam tamen, *set maximu' muto.* Rectè autem in
 Lactantio est, *praesident.* Præsidere enim verbum in
 casto operantium proprium: in eo more suo ex ambi-
 guo lusit Plautus Mostellaria: *u. Qui homo.*

Ego interim hanc aram occupabo. T H. quid ita? T R.
nullam rem sapi.

Ne enim

*Ne enim illi confugere huc possint, quæstioni quos dabit;
Hic ego tibi præsidebo : ne interbitet quæstio.*

CAPVT XXIV.

*Plauti Stichus emendata locis duobus, vno Trinumus. item
Titinnius leniter.*

STICHO, SCÆNA Mercurius Iouis:

*Heram ex marore eximam, benefacta maiorum meum
Exaugeam, atque illam augeam ex insperato à portu modo.*

Verba postrema vitij manifesta sunt: emendo, ex insperato à portu bono: vel, si mauis litterarum ductum sequi, ob portum bono. Bonum ob portum est quod in portu est. Ob enim antiquè significat ad. Ennius:

Ob Romam noctu legiones ducere cepit.

Ad autem in loco motum sæpe significat, Rudente:

Neque quiui lenonem ad portumprehendere.

Alterum tamen magis probant, quæ infra sequuntur
Dinacij verba:

——ita celeri iui curriclo

*Properè à portu tui honoris caussa. P. A. ecquid apportas
boni?*

Mox, Eadem Scæna:

Commodum radiosus sole esse superabat è mari.

Rectum opinor esse, sol sese superabat è mari. Supera-

*bat pro tollebat ἐπερυντικῶς ἀρχαῖον μῶν. Ita penetrare
se in domum idem Plautus, emigrare se ædibus dixit Titinnius. sic enim eius versum emendo apud
Nonium in Senium: ——quot pestes, iurgia, senia,
Sesemet hisced emigrârunt ædibus.*

*Et plurimis locis apud Plautum sese & esse loco se
inuicem mouerunt. ita quod editur Trinumo scæna
prima:*

Indignum

Indignum ciuitate hac esse viuere,
 nemo dubitabit, saltem non imperitissimus, rectè à
 me emaculatum,

Indignum ciuitate ac sese viuere.

CAPVT XXV.

M. Varro quinto De lingua Latina emendatus.

MIRVM est quantulum mendum quantas sæpe
 tenebras in bonos libros inuehat. vel hunc locum M.
 Varronis libro De lingua Latina quinto quis hacten-
 us intellexit? Nam *Flamen Dialis auspicatur vindemiam*
& ut iussit vinum legere, agna Ioui facit: inter cuius exta &
porrecta Flamen prorsus vinum legit. Omnes certè ante
 me ita acceperunt iussisse Flaminem vinum legi, tum
 agna Ioui fecisse: quo nihil à sententia Varronis alie-
 nius, & manifestò arguunt vanitatem sequentia. Sed
 vide leuissimam erroris causam: syllabæ duæ coalue-
 runt, quibus diuisis non meridie clarior lux est, quàm
 huius loci sententia. Lego, & *ut ius sit vinum legere.* Vt
 liceat, inquit, & ius fasque sit vinum legere, flamen
 Dialis agna Ioui facit; tum ipse inter exta erectus vin-
 demiam auspicatur.

C IANI

VERISIMILIUM

LIBER SECVNDVS.

CAPVT I.

Lucillij Saturæ xxx. quod videatur fuisse argumentum. in eam rem complures ex ea versus adducti, & de coniectura compositi, correcti.



VCILLII pleraq. omnia maiorum incuria intercidiſſe valdè mihi indignum videri ſolet. Mitto hominem fuiſſe eruditiffimum & linguæ Latinæ ſciētiffimum, quod Fabio & Gelio; primùm ſtyli naſum condidiſſe, quod Plinio maiori; ſcripta eius vnicum apud Latinos *χαρκτηρ* & *ἰχρὺς* exemplum eſſe, quod M. Varro ni viſum fuit: quanti tandem illud putandum? vitiorum inſectatorem acerrimum fuiſſe, quod vno omnes ore loquuntur. Habèret in quo ſe tamquam in ſpeculo contemplaretur hæc ætas virtutum inanis, vitiorum fertiliffima. De me, facio quod poſſum, a-
iunt, quando quod volo non licet. Fragmenta quæ comparent in rutis cæſis Grammaticorum ſublego, mendosa emaculo, diuulſa compono, atque ex illis librorum quoque ipſorum argumenta, quod poteſt, ariolor. Id an adſecutus ſim libro Saturarum xxx, doctorum erit arbitrari; ego quid me obſeruafſe mihi perſuaſerim proponam. Cenſeo enim bonam partem conſumptum in maritum inſectandis miſeriis, quos ait vxorum illecebris captiuos teneri. ſic enim
coheſiſſe

cohesisse coniiciebam versus, qui hoc docent.

Atque illud quoque mite malum blaydum atque iocosum;

Si laqueis mancis, pedicis mens irretita est,

Præsternit labra deliciis, delenit amore.

Tum eosdem legibus coërceri ait, ut res suas separatas habeant, ut mundum muliebrem & supellectilem domesticam affatim suppeditent, ut terra mari vel cum capitis periculo rem faciant. Huc enim spectant illa,

Accipiunt leges, populus quibu' legibus expers,

Hoc missum facies, illo me vtère libente.

& hæc paullò vel antè vel posterius (quis enim certum adfirmet in re tam incerta?) posita:

—————*curabi' domi sint*

Gerdus, ancilla, pueri, zonariu', textor

Euplocamo digitis discerniculúmque capillo:

Culcitule accedant binæ centonibu' priuis

Omnia alia, in quibus efferimur rebus: ne ego multis

Eloquar.

Eodem referendum arbitror hoc viri ad obiurgantem coniugem, ut suspicor, responsum à Nonio, uti & priora, diuulsum.

Id' que tuis seuis dictis ac tristibu' factis

Hæc tu me insimulas? non ne antè in corde volutas

Quid dare, quid sumti facere & præstare potissim.

Denique & has de itineribus & periculis maritorum iniectas in Noniano pelago tabulas & à me nescio uàm rectè, certè non inconuenienter, comparatas erum & tamquam conglutinatas:

—————*se conficit ipse comestque*

Vir, mare metitur magnum, se fluctibu' tradit.

Continuò simulac paullò vehementius aura

Inflûrit fluctus, erexerit, extuleritque,

Omnia endo mari videas feruente micare.

At bonas matresfamilias interim desidia sua & crebris ad amicas; siue amici sunt; itionibus rem mariti conterti & dilabi pati idem adfirmat. Sic enim coagimento hos versus:

*At cùm iter est aliquò, & causam conmentia viauit,
Aut apud aurificem, ad matrem, cognatam, ad amicam,
Aut operata aliquo in celebri cum aequalibu' fano;
Lana opus omne perit, pallor, tinea omnia cadunt.*

Quin adiicit, vltro illas inelamatas quiritare & culpam defendere:

*Quid tu isthic curas vbi ego oblinar atque voluter?
Quid seruas quò eam? quid agam? quid id attinet ad te?
Tunc iugo iungas me ante & succedere aratro
Inuitam, & glebas subigas proscindere ferro?*

Itaque eodem hoc libro idem Lucillius contendit muliebre ingeniũ cum leonis decrepiti lustro, quod cata illa & vafra vulpecula subire noluit; cùm videret vestigia ferarum quæ se intrò penetrauerāt prorsus ferri omnia, rursus nulla: quem locum eruditissimi poëta, à Platone sumtum, Horatius vt multa alia æmulatus ad æstus populi & reipub. motus trāstulit:

*Quòd si me populus Romanus fortè roget, cur
Non vt porticibus sic iudiciis fruor hisdem,
Nec sequar aut fugiam qua diligit ipse vel odit:
Olm quod vulpes ægroto cauta leoni*

*Respondit, referam: quia me vestigia terrent,
Omnia te aduersum spectantia, nulla retrorsum.*

Eundem apologum in Lucillio fuisse narrarunt mihi aliquot indidē reliquiæ; sed ita malè perciso ore, vt è balbis eximi non possint. eas sparsim subiiciam.

* * leonem Aegrotum ac lassum.

*

*

*Qui non spectandi studio, sed omni' tetri
Impulsu ingressus.*

Ita enim emendo, quæ publicantur. *Q. n. expectans
spectandi studio, sed hominis:* perspicuè falsò. De vulpe
virili genere, more sui seculi, loquitur.

* * *

Et sua perciperet retro relictâ iacere

* — *

*Deducta ad hunc voce leo. cur tu ipsa venire
Non vis huc.*

Verba leonis, in quibus emaculandis iam olim inci-
di cum amico meo. Nonius: *Deductum, diminutum,
suppressum.* rectè, & talis vox ægrotorum & senum.
Sic Virgilio deductum carmen est humile & depres-
sum, quale bucolicum: non, ut idem ille Gramma-
ticus malè explicat, molle & suaue.

* * *

*Quid sibi volt? quare fit? ut intrò, versus & ad te
Spectent, atque ferant vestigia, & omnia prorsus.*

Vulpeculæ verba sentientis leonis simulationem, ut
scripsi distinguenda: ad quæ ille, ut videtur fidei fa-
ciendæ causâ, respondet:

*Tristem & corruptum scabie & porrigini plenum
Hic in stercore, humi, sabulisq; fimo atque sucera
Insulta miserum te quoque in me.*

Vbi notabis exemplum tmeseos Lucillianæ, de qua
Aufonius, versu ultimo. Insultate enim coniungen-
dum est: ut paullò antè dixit, *versus & ad te:* pro quo
Horatius, *te aduersus.* Concluisse apologum videtur
ita, ut muliebri malum adfirmaret blandius quidem
esse, sed eo ipso maius & propius perniciem. Ita enim
hæc expono:

Improbior multò, quàm de quo diximus antè,

C 3

Quandò

Quantò blandior, hoc tanto vehementius mordet.

Postremò addam, videri mihi occasionem huic Saturæ scribendæ Lucillio dedisse nescio quem conuiciatorem, cui reponere hoc pacto voluerit, vt eum nuplisse vxori ostenderet: tum in vniuersum sexum *ἁπάντων*, vt sit, incurrisse. Vnde id imbibere suspicari, adiiciam (semel enim qui pudorem migrarit; nauiter, aiunt, impudentem esse oportet) tutelam aliquot versuum meam.

Nunc Cai quoniam incilans nos ladi' vicissim,

Et maledicendo multis sermonibu' differs

Quum scis scire tuas omnis maculasque notasque,

Summatim tamen experiar rescribere paucis,

Quantas quòque modo arumnas quantosque labores

Exanclâris, vti pecudem te vt denique nasci

Præstiterit asinum.

In quâ, vt subtilis est imperitia, etiam nomen me mouebat Caij. Notum enim illud in nuptiis solleinne, Vbi tu Caijs, ego Caia.

C A P V T I I.

Mansum ex ore dare, prouerbiu. Orea. Culpa. Eadem Saturâ emendatus Lucillius,

LVBET etiam num ex eodê libro paucula quædam malè affecta, quod nobis dij opis dabunt, persanare. Nonius Mansum.

*Lucillius lib. x x x. Sperans atatem eandem hac proferre posset * mansum ex ore daturum.*

Nescio an desit quippiam, vbi asteriscum collocauimus. Certè priora liquet mihi asseuerare rectè à me in versum hexametrum reposita, *Sperans atatem eadem hac perferre potesse, & mansum ex ore daturum.* Vbi nobis

nobis prouerbiū, quod etiam nunc in frequenti
vfu est, mansum ex ore dare.

Idem, Rumpere.

*Lucil. x x x. Quæ quondam populi oris, aures, pectora
rumpit.*

Rectum est, *populi oreas*. Oreæ frenos significat & la-
bia; vt hîc & apud Næuium: Deprandi autem leonis
obdas oreas. de re periculosa. Lucillius, vt apparet,
de re ita peruagata loquitur, vt vulgò nihil aut lo-
querentur aliud aut audirent, aut cogitarent.

In Bonus.

*Lucil. x x x. Caluus Palantino quidam vir nobilis bo-
nus bello.*

Emendo, *Palatina*. nota formula est, & sic Cicero:
Verres Romilia, subintellige tribu. Hoc primum: de-
inde versum moneo *μείζον ἢ τελέιαμβον* esse, quos ex-
emplo Græcorum nonnumquam interiiciebant La-
tini vetustissimi. Liuius:

Dirige odorisequos ad caca cubilia canes.

Postremò istud bellè sententiæ explendæ adiectum
videri à Nonio ex hoc versu qui ex eodem libro ad-
ducitur in Sæuum.

Et sæuo & duro in bello multò optimus hostis.

Fallacia fallaciam trudit, aiunt: ita coniectura conie-
cturam. & hîc postremam vocem mutandum cen-
seo in *hastis*. Itaque hos versus coniungo:

Caluu' Palatina quidam vir nobili' bonus,

Et sæuo & duro in bello multò optimus hastis.

In Hilum.

*Lucillius x x x. Quòdque tuas laudes culpas non proficis
hilum.*

nè habet versus, & nugantur qui mutant. Culpæ
quouis scriptore loca deculpata, vt ait Gellius, &

quibus meritò criticus theta præfigat. Aufonius:

In'que tuis culpis tu tibi da veniam.

Taxat nescio quem poëtam, cui sese aded præfert, ut
sua poëmata tantum teri affirmet hoc versu,

Et sola è multis nunc nostra poëmata ferri.

CAPVT III.

Tagere. Tagaces. Peruenari. Truculentus Plauti correctæ.

BELLE ludit ancillula Truculentò in adolescentum
rapacitatem, Scæna Ad fores auscultate: sed in-
ibi non bene legitur,

Vnus eorum aliquis osculum amica vsque oggerit,

Dum illi agant.

Malit enim, *Dum illi agant.* Tagere sine tangere ar-
gento circumducere & furari est. Milite: *Tetigit cali-*
cem clanculum. Epidico: *Istis aded te tetigi triginta mi-*
nis. Hinc tagaces Lucillio furaces. Hoc ergo ait, quos-
dam congeritronum amicæ; alios interibi rapinæ ope-
ram sedulò dare. Scæna, Num tibi nam amabo.

— *mater ancillas iubet*

Quoniam iam decumus mensis aduentat propè

Aliam aliorum ire, præmandare, & querere

Puerum aut puellam.

Nihil ad sententiam, præmandare. Emendationem ta-
men non extrico: nisi fortè scripsit Plautus:

Aliam aliorum ire peruenari & querere.

Certè id verbum huic loco aptissimum, & vsus eo est
Mercatore,

Defessus sum urbem totam peruenariæ.

Ibidem paullò post:

Eum nunc non illa peperit, quæ peperit prior;

Sed tu posterior. P. H. omnem rem tenes.

versu

versu posteriore numeri non pleni sunt, & mea sententia nihil certius quàm excidisse hinc ob similitudinem litterarum vocolam, scribendumque esse,

Sed tu posterior. P H. ordine omnem rem tenes.

Scana Ne expectetis.

——— adduce huc tu istas: sed ista regine domi
Sua fuere ambæ: verùm patriam ego excidi manu.

Iis te dono. pœnitet ne te quod ancillas iam?

P H. *Quin etiam ne insuper adducas quæ mihi comedint cibum.*

Locus & à personarum collocatione & à verbis corruptus. Docet vtrumque Donatus, qui simillima ait hæc Terentij Eunucho:

An pœnitebat flagitiū te auctore quod fecisset

Adolescens, ni miserum insuper etiam indicares patri?

tum Plauti verba laudat; sed, vt nunc in libris est, corruptissimè: nos vestigiis, quàm potuit, proximè inherentes ita restituimus.

Iis te dono. P H. pœnitet ne te, quòd ancillas olas alam,

Ni insuper etiam adducas, quæ mihi comedint cibum?

Cùm fastidiret miles in commendandi munere, meretricula callidè eiusdem eleuandi; an, inquit, parum tibi videtur, familiam tantam, quam vides, alere? nisi adducas mihi etiam plures, quæ rem meam deuorent. Ita scribissè Plautum, aut certè proximè, vt egotaceam, res loquitur.

C A P V T I V.

*Exante. Inante. Insuper habere. Superesse prodesendere.
Emendatus Appuleius & de Oratore Cicero.*

Non grauabor ex Appuleio quoque maculas aliquot tollere, scriptore supra vulgi opinionem bono,

& perstudioso vetustæ & germanæ Latinitatis: tamen etsi affectata in illo, & à pedestri stylo abhorrentia, multa. Sed scitum est Athenæi illud τὸς ἀλμυρὸς λόγος εἶν γλυκέσιον ἀποκλύσιδος γάμμασιν. Libro primo Milesiarum, siue de Asino aureo hæc notabam.

Et tamen Athenis proximè & ante Pæcilen porticum isto gemino obtutu circulatorum aspexi equestrem spatham præacutam mucrone infesto deuorasse.

Suspisor corrigendum, *Exante Pæcilen porticum.* *Exante* vetustè, pro *ante*: vt Propertio *inante*: Hic dominam exemplo ponat *inante* meam. Ibidem:

Hic qui meis amoribus subterhabitis, non solum me diffamat probris, verum etiam fugam instruit.

Legendum, *meis amoribus insuperhabitis.* Insuperhabère est negligere, contemnere: vsus eo verbo Papinianus I. C. in Pandectis bis, item Gellius & ipse Appuleius alibi. Huic contrarium est superesse, pro auxilio esse & defendere. nam malè Gellius ita Latine nos loqui posse negat: & rectè Palmerius noster adductis in medium exemplis aliquot contrà tendit. de quo ne dubitari possit vltèrius, testem adducam, quem numquam ita impudens erit vt reiicere audeat Gellius, M. Ciceronem libro primo De Oratore. Equidem, inquit, propinquum nostrum P. Crassum illum diuitem cum multis aliis in rebus elegantem hominem & ornatum, tum præcipuè in hoc efferendum & laudandum puto, quòd cum Scæuulæ frater esset, solitus est ei persæpe dicere, &c. Quo in loco postrema verba manifesta vij. neque enim Scæuulæ Crassus aut natura aut adoptione frater fuit: & præclarè membranæ collegij Tosani, quarum lectiones mihi ostendit vir doctissimus & mihi non amicitiaè solum sed & hospitij nomine coniunctissimus Suffridus Petrus; præclarè in-

quam

quam illa: quod cum P. Scauula superesset. hoc est, ut ego interpretor, tutelam illius gereret. Tutores enim pupillorum rebus supersunt; quod ipsi per ætatem non possint. ita ergo isthic emendandum censeo.

Eodem Appuleij libro, infra.

Modico deinde regressa, patefactis adibus: Rogat te, inquit inutuli me, eumque accubantem exiguo admodum grabatulo & commodum canare incipientem inuenio.

Nihil deest, quod cuipiam videri possit: interpunctione tantum indiget, & leui correctione. *Rogat te, inquit: intuli me.* Rogandi solo verbo utebantur, cum quem ut vnà esset & accumberet inuitarent. Ipse Appuleius libro hoc extremo: *Et ecce Fotis ancilla, rogat te, inquit, hospes.*

CAPVT V.

Tegillum & tectum, pro veste. Alieni. Appuleius correctus: item Lucillius apud Nonium & Cato apud Festum.

TEGILLVM pro integumento corporis seu veste vili & plebeia frequentatum constat è Festo & Nonio, & exemplis quæ iidem laudant, Plauti Rudente: *u. Quia*

Tegillum eccillud mi vnum arefcit, id si vis dabo.

vincit en

Eodem amictus, eodem tectus esse soleo cum pluit.

Et Varronis Sesqui-Vlyffe:

Iugère volitans miluos visus aquam è nubibus

Tortam indicat adfore: tegillum vt pastor sibi

Sumat.

Id verbum reponendum apud Appuleium libro ix. Nonnulli exiguo tegillo tantummodo pubem inlecti. Malè enim vulgò, tegili. Porro adiicit Nonius, *deminutum esse à tecto.* rectè. Sic enim à *recta*, quod idem vestis genus est, *regilla*: & tecto quoque vestem significari argu-

Co. xv. argumento est Lucillij locus apud Nonium Palla:

scu. Cypri Cùm tectum est (quid vis?) satis est: visuri alieni

ii. Epistoli. Sint homines spiram, pallas, redimicula.

25. lib. Ita eum locum interpungo & lego. Cùm, inquit, ve-

es Janius stita es quomodolibet, satis est tibi: quid requiris am-

Nonius plius? alij in ornatu anquirendo fastidiant. Alieni e-

nim hîc iidem qui alij: vt socieni, socij; dubieni, du-

bij. Et quia hîc sum, addam locum Catonis ex v i i.

Originum priori simillimum: apud Festû, Ruscum.

Mulieres opertas auro purpurâque: arfinea, rete, diadema,

coronas aureas, russeas fascias, galbeos lineas, pelles, redimi-

cula. Ita correxit præclare, vt omnia, sed litterarum

Scaliger: vnum restat tamen, sed leuiculum, men-

dum. Legendum enim, pallas: non, pelles. Palla in-

ter præcipua mundi muliebris, pelles non item. nam

quod Festus alibi prodidit lugentes diebus luctus in

pellibus fuisse, huc pertinere non potest.

C A P V T V I.

E Plauto insigne glossema sublatum: tum emendati & con-
cinnati versus aliquot.

AMPHITRYONE Plauti primore fabula versus
sunt & numeris confusissimi & pleni mendorum. In
iis quos subscripsi:

Opulento homini hoc magis seruitus dura est

Hoc magis miser est diuitis seruos.

Noctēsque diēsque assiduò satis superque est,

Quo facto aut dicto adest opus quietus ne sis.

Ipse dominus diues operis & laboris experts

Quodcumque homini accidit, liberè posse retur.

Aequum esse putat, non reputat laboris quid sit,

Nec equom annu iniquom imperet cogitabit.

Eos

Eos in senariorum legem reponendos & corrigendos vt arbitror, ita subiiciam: tum facti mei causam dabo.

Opulentod homini hoc seruitus dura est magis,

Noctésque diésque assiduo sati superque esit,

Quo facto aut dicto est opus quietus ne sies.

Ipse dominus operis expers & laboribus

Quodcumque animum accidit libere, poscere

Aequom putat esse, non laboris quid fiet

Reputat, nec aequom ne anne iniquom imperet.

Primum illa quæ eieci, hoc magis miser est diuitis seruos, liquet mihi affirmare interpretationem esse versus primi adiectam ab indocto magistro, ita inficere vt me in hoc diutius immorari pigeat. Deinde scripsi, *satis superque esit*: quod ἀρχαισµῶ hoc, *esit* pro erit, librarios offensos correxisse arbitrarer, qua in sententia maneo: si tamen ita quis malit quæ diuidat, & constabit versus. Tertio versu quid aliter facerem quàm feci non habebam, si Plautum Latine loqui vellent. semper enim Latini, est opus facto: numquam ei modo, quo editur vulgò. Sequitur,

Ipse dominus operis expers & laboribus.

mutatione, fateor, subaudaci: quæ tamen ratione nitatur. *Opera pro labore* paullo minus quàm protritum est. Cicero: Mercenariorum operas non artes emimus: *in Off* etiam ignotius fortasse gaudere non minus auferendi casu quàm gignendi istud, expers. Turpilius: *apud Non-*

Neque mirum educta, vt par est, expers malitiis. *in Plautus*

Eam occasionem suspicor fuisse cur mutarent temere qui non caperent. Si quis tuebitur lectionem publicam, cum eo non valde pugnabo: hoc modò ne diffiteatur è glossa esse τὸ δυνες, ad illud quod præcessit, assiduus. Cetera, nisi me valde fallit, benè restitui: *pro Geni*
Illud

Illud homini occupasse libros pro *animum*, minus mirabitur qui idem irrepsisse in omnes libros cogitabit apud Ciceronem in epistolis, in illo Trabeæ:

Ego voluptatem animi nimiam.

CAPVT VII.

Tolutim ire. Acupediū. Sonticum. Remos detondere. Emen-
datus Nortij versus, & complures Lucillij.

LVCILLII versum Nonius adducit in Tolutim.

Idem: Velle tolutim hic semper incepturus videtur.

Eum pudenti mutatione restituere conabar,

Vele' tolutim hic semper incessurus' videtur.

Loquitur de milite, qui magnificè & equi tolutarij in modum se inferat, siue etiam qui celeriter, & acupediū sit: sicut enim veteres *ποδῶντα* transferunt: sed verius prius. Incedere, siue, vt Plautus, *καδῶντα* tolutim equi gradarij est: hinc migratione in alienum tolutim ire accelerare est. Nouius: *Dixitutum in Tuscos tolutim.* Sic lego, litterula extrita. Inde tolutiloquentia, quam interpretatur M. Tullius volubilitatem verborum lingua exercitata & celeri. Nouius Gallinaria:

O pestifera, Pontica, fera, trux tolutiloquentia.

Vbi reponendum moneo pro Pontica, quæ vox quid sibi velit, hîc quidem, non video, *sontica*; hoc est, noxia & lethalis. Nam sonticus morbus est qui diuturnitate noxius, & sontica causa grauis, & quam subterfugere non possis. In Guberna.

Lucillius Satur. xx. Proras despoliate & detundite gubernæ.

Lege, *detondere.* Gubernæ posita pro gubernaculis *ἐλκυσμῶ* Nonius hîc admonet, & imitatus est, vt ple-
raque

raque huius poëtæ, Lucretius. Detondere gubernacula aliis remos detergere est. Cæsar primo De Bel. Ciu. *Remos transcurrentes detergere, si possent, contendebant.* In Fulgêre.

Lucilli. Satur. x i. Conuentus pulcer! braccæ, saga, fulgere torques Magni.

voce vltima inducta corrige, Manli. Gallis peculiarum habitum notat, braccas, saga virgata, torques, quos iocosè Manlij dicit, quod T. Manlius torque Gallo detracto Torquatum cognomen in familiam induxerit. Eundem habitum ex parte Tacitus tangit in historia Augusta, de Cæcina loquens. *Ornatum ipsius municipia & coloniae in superbiam trahebant, quod versicolore sagulo braccas tegmen barbarum indutus togatos alloqueretur.* Vbi nescio an è glossemate sint illa, *braccas tegmen barbarum indutus, & legendum sit, braccatus togatos, vt aliàs Latini.* Certè non ita ignotæ Taciti sæculo braccæ, vt explicandæ essent. hoc tamen pono, non etiam adfirmo.

CAPVT IIX.

Consilium. Consiliari. Opus approbare. Durare. Illustratus Plautus Pænulo & Afinaria.

FULLONIAM hoc capite demereri mihi lubet, eademque elegantem locum Plauti illustrare, primo re fabula.

Placet consilium. MI. immò etiam vbi expoliuero,

Magis hoc tum demum dices, nunc etiam rude est.

Duo olim fullonum officia erant; vestem eluere & cogere vnum, alterum eandem creta candefacere: illud consiliari dicebant, & ipsam actionem, quod insultu multo pedum fieret, consilium; hoc, expolire.

Varro

Varro De lingua Latina libro quinto. *A cogitatione concilium, unde consilium. quod ut vestimentum apud fullonem cum cogitur consiliari dicitur: sic reminisci, cum ea quæ tenuit mens ac memoria cogitantur & cogitando repetuntur.* Quem locum ut obiter explicem, à paucis perceptum: cogitare, inquit, est crebrò cogere, unde concilium, quia cogitur; & hinc consilium, in re fullonia, quod vestimentum cogat; in animo humano, quod cogitet id est multum diuque cogat ea quæ memoria tenuit. Hæc igitur urbanissimi ioci mens est. ait adolescens placere sibi consilium, intelligens inuentum serui de subornando villico: at ille ita accipit, quasi de veste clauta & coacta loqueretur: immò, inquit, nihil est præ ut mox opus meum tibi probabo, cum addidero politias ceteras. Nam ut nunc res est, consilium quidem est; sed rude & sine politiis. Notum autem est mercenarios opus approbare solitos dominis. Appuleius libro sexto. *Singulisque gravis rite dispositis atque seiugatis ante istam vesperam opus expeditum approbato mihi.* Milite:

——— *Satin' est tibi, si*

Meum opus dabo ita expolitum, ut improbare non queas.
Ad quem morem etiam respexit. Porro duradi quoque verbum fullonum proprium erat, quod vestis coacta & incretata durescat. Absque hoc sit, Sibyllæ folium erit versus, Asinaria: *ve. Ari tu neu' uin'*

Non queo durare. PA. si non didicisti fulloniam,

Non est mirandum.

Vbi malè afflictamur, ibi nos durare posse venustissimo loquendi genere negamus. Terentius:

Non hercle hic quidem durare quisquam, si sic sit, potest.
Miseriam ergo suam & dolorè animi muliercula cum significaret, parasitus per deridiculū aliò detorquet.

CAPVT IX.

Lucillij fragmenta aliquot correctâ, composita, & cum Terentij loco simili collata.

P E R G A M è Lucillio maculas tollere; & primum ex his versibus, adductis à Nonio in Rogare.

Ferri tantum si roget me non dem quantum auri petit, si se cupit et si quoque à me quæ rogat non impetret.

Septenarij sunt, neque difficulter emaculantur ita:

Ferri tantum, si roget me, non dem, quantum auri petit: Si se cupiet, sic quoque à me, quæ rogat, non impetret.

Arilator nimirum is rogator erat, qui mutuam pecuniam gestiret sumere Kalendis Romanis, quam Græcis redderet. In Repedare.

Lucillius x x v i. Redisse ac repedasse, vt Roma vitet gladiatioribus. Idemque. Sanctum ego à Metello Romam repedabam munere.

Exemplo priori acutè amicissimus Palmerius legit, *Romam vt bitet gladiatoribus, id est, spectaculis gladiatoris.* Reliqua arbitror ita scribenda: *Idem. Quis actis ego à Metello repedabam numero.* Numero idem quod celeriter, ocys: vt omnes nôrunt.

In Posticum.

Lucilli. v i i i. Pistrinum appositum posticum, sella, culina. Melius est, oppositum postico, cella. In Offendere.

Lucil. x x v i. Si quod verum inusitatum autem ἤντιματιον offenderam.

Suspicio verum esse, verbum inusitatum, aut ἤντιματιον. Ex eodem hoc libro quæ adferuntur apud Nonium in Apisci, Niti, Cordi est:

Et quod tibi magnopere cordi est, mihi vehementer displicet:

**Summis nitere natura opibus; at ego contrâ vt dissimilis siem:*

D

Vi ego

Vt ego effugiam, quod ego te inprimis cupere apisci intellego.

octonarij tres sunt, quos ita olim cohesisse non dubito, nisi quòd ante versum secundum quid videtur deesse: expressi autem sunt à Terentio Andria penè ad verbum. *act. 2. sc. 1. ad fin.*

——— *sed si id non potest,*

Aut tibi nuptia hæ sunt cordi. Et mox:

Nuptias ego istas effugere malo, quàm tu adipiscier.

CH. Reddidisti animum. P A. nunc si quid potes aut tu, aut tu Byrrhia,

Facite, fingite, inuenite, efficite, quæ detur tibi:

Ego id agam, mihi quæ ne detur.

C A P V T X.

Eiusdem Lucillij versus cum Terentij & Virgilij compositi: tum adducta in medium & emendata insignis sententia.

SI NE dolo dicam, valde gaudeo, cum in imitationes incido optimorum auctorum expressas de scriptis vetustiorum siue oratorum siue poetarum. Vindicare enim mihi videor antiquitatis Romanæ studiosos, à calumnia certorum hominum, qui ex his ipsis semisepultis ruderibus, si quid ex usu sit, cupidè sublegunt. Quare si qui Latinam linguam contaminari putant, ne illi eodem maledicto Terentium, Virgilium, è ceteris optimum quemque circumscribunt; quos hi nostri auctores habent. Certè respexerint ne ij quos posui ad Lucillij versus quos subiiciam, ipsi viderint: geminos quidem sibi inuicem esse non negabunt. Lucillius apud Nonium in Genius:

*Curet egrotum, sumtum homini prabeat, genium suum
Defrudet, alij parcat.*

Teren-

Terentius, Phormione: *act. 1. 11. 1*

*Quod ille vnciatim vix de demenso suo
Suum defraudans genium compararit miser,
Id ila vniuersum abripiet.*

Lucillius *xxvii*. Nonius, Mordicus.

Mordicus petere aurum ex flama, expediat è cæno cibum.

Terentius Eunuchus. *act. 3. 11. 2*

E flama petere te cibum posse arbitror.

Lucillius *xxvi*. Nonius Proprium.

Cum sciam nihil in vita proprium mortali datum esse.

Terentius, Andria. *act. 4. 11. 3. citius*

Nihil ne esse proprium cuiquam?

Lucillius *xxvii*. Nonius, Pernix.

Fuimus pernice, aeternum id nobis sperantes fore.

Virgilius, Æneide.

— Fuimus Troes, fuit Ilium, & ingens

Gloria Dardanidum.

Sed hæc leuiora: adiiciam locum ex eodem Nonio in
Dare; quem mendosè legi arbitror:

*Lucillius lib. xxvi. Animoque agrotat vidimus corpore
hunc signum dare.*

Scribo, *Animo qui agrotat, videmus*. Philosophica sententia est, animi turbati indicium facere habitum corporis; contra, corpus doloribus confectum animo vegere. Vtroque enim animo & corpore hominem, id quod est esse, & viuere. Hæc adiecisse Lucillum ex duobus præterea fragmentis collego: quæ in septenarios recollecta cum hoc non pessimè composui:

Animo qui agrotat, videmus corpore hunc signum dare;

Tum doloribus confectum corpus, animo obistere.

Principio physici omnes constare hominem ex animo

& corpore

Dicunt.

CAPVT XI.

Herere alicui. Numerus. Neglegi pro neglexi. Sacramenti militaris formula. Correctus Cicero Philippicis, & Terentius Adelphis.

PHILIPPICA XIII. omnes libri editi habent: Est etiam Decius, ab illis opinor Muribus Decis. Itaque Cæsaris munere Deciorum quidem multo intervallo per hunc præclarum virum memoria renouata est. Non incommodè, absque libro veteri esset, qui legit: numero Cæsaris fessit. Deciorum quidem. Perspicuè rectum est, numero Cæsaris hesit. Herere alicui est implicari & irretiri alicuius consuetudine: idque potissimum in vitio ponitur. Terentius Adelphis:

optumè est. Metui ne hereret huic.

Ita enim optimum fragmentum Colonienſe, neque dissentit Donatus, atque ipse Demea primore hac scæna:

Vbi ego illum quæram? credo abductum in ganeum

Aliquid: persuasit ille impurus, sat scio.

Eleganter ergo Cicero hunc Decium nomine dumaraxat commendatum hesisse ait non Cæsari sed numero Cæsaris: simul & colluuiem familiarium Cæsaris notans & huius Decij vilitatem, qui ei numerus tantum fuerit, hoc est, precio aut loco nullo. Sic

enim & Horatius: Nos numerus sumus.

Eadem infra, epistola M. Antonij,

Theopompum nudum expulsus à Trebonio confugere Alexandriam neglexistis.

Idem liber, neglegistis: idque recipere mihi religio non erit. Locutus ita Æmylius Macer, teste Diomede: *Omni auctoritatem neglexerunt. Et affectasse obsolescentes voces Antonium ex Suetonio constat.*

Ali-

Aliquantò inferius:

At militibus inclusis opem fertis. nihil moror, illos saluos esse & ire quò lubet.

Melius scripti, & *ire quò iubetis*. Allusit ad sacramenti militaris formulam: *Ibo quò Senatus Populúsque Romanus iusserit.*

CAPVT XII.

Sarcinare. Acie. Machinà sarcinatricum. Nonius restitutus, & explicatus apud eum Varro.

NONIVS in Sarcinatrice.

Sarcinatrices non (vt quidam volunt) sarcitrices, quasi à sarciendo: sed magis à sarcinis, quòd plurimum vestium sumant. Varro ὀρῶ & λύρας. Homines rusticos in vindemia incondita cantare, sarcinatrices in machinis.

Primum verba Nonij emaculo, quòd plurimum vestium suant. Vult sarcinare quasi frequentatium esse primigenij sui sarcire. Deinde in exemplo Varronis, fuit cùm legerem, in acis: vt Catullus dixit, in vino ludere. Acus enim & acie sarcinatricum & phrygionum propriæ. Titinnius Bæbato:

Phrygio fui primò benèque id opus scini,

Reliqui acus aciasque hero atque hera nostra.

Sed muto iam nunc sententiam. Machinæ pergulae sunt, in quibus sarcinatrices opus facitabant non hoc modò Mineruæ, sed alterum quoque illud, ni fallor, Veneris. Semper enim id genus mulierculæ hanc partem malè audiêrunt. Itaque Q. Cicero C. Antonio crimini ponit, amicam eum in Prætura de machinis emisse: De petitione Consul. Quo tamen in magistratu amicam quam palam domi habêret, emit de machinis. In magnis familiis vt ornatrices, vestispicas;

ita sarcinatrices partem famulitij fuisse pars lapidis
Romani indicat:

IVLIA . IVCVND A
AVG. L. SARCINATR

CAPVT XIII.

*Eloco pro illico. Plautus Menachmis & Truculento emen-
datus: item Varro.*

MENÆCHMIS, Scæna Vtætas.

At ille mihi supulat aurum & pallam ex arcis, modò

Me despoliat, mea ornamenta iam ad meretrices degerit.

*Scribo, ex arcis domo: & versu secundo, clam ad mere-
trices degerit. Perpetuus in his vocibus error libra-
riorum, & postulat sententia. Sic enim respondet
mox Menæchmius.*

Deosq; testor. s. E. qua de re aut cui rei rerum omnium.

*ME. Me nequè isti malè fecisse mulieri, neque, quod me
arguit,*

Hanc domo abs se surripuisse.

*Quæ coniecturam meam ita probant, vt vltra verbis
nihil opus sit. Similem maculam eluam Truculen-
to, Scæna Numnam tibi amabo.*

Ego isti non munus mittam: iam modò ex hoc loco

Iubebo ad istam quinque perferri minas.

*Versu priore & numeri euagantur supra plantam, vt
aiunt; & vacillat sententia. Non enim à via, vbi tunc
erat, perferri munus ad meretricem iussurus erat: sed
à se domo. Quare restituo; iam domo eloco Iubebo ad
istam q. p. m. Eloco & ilico promiscuè triuerunt La-
tini veteres: vt eosdem illum, ellum, ollum indiffe-
renter vsurpasse testimonio sunt Grammatici & ex-
empla scriptorum. Hoc cum nescirent librarij (quid
autem*

autem illi non nesciunt?) pro capto suo emendarunt: si peruertere emendare est. Significant autem ea particulae & tempus, ut hinc & plerumq. alibi, & locum, ut veriloquij. Est enim eloco, quasi eo loci: & ab illico aduerbia *τοπικὰ* descendunt, illic & illi. Varro, *ὅτι λύρας*: apud Nonium in Mansuem.

Non vidisti simulacrum leonis è loco, ubi quondam subito eum cum vidissent quadrupedem Galli, tympanis adeo ferunt mansuem, ut tractarent manibus.

Non dubia correctio est, *eloco*, ubi quondam: quod & sibi iam pridem venisse in mentem, mihi, cum hæc legeret, significauit Palmerius. Infrà quiuis videt scribendum, *fecerunt mansuem*.

CAPVT XIV.

Mos antiquus laudandi nouam nuptam, & cur iactati in nuptiis fescennini.

NOTAVIT Nonius tali pro talis positum à Titinnio Setina, his versibus:

—— accede ad sponsum audaciter:

Virgo nulla est tali Setia.

Nescio an aliis, mihi certè non persuadet: & nescio an scribserit Titinnius, *est tale Setia*: ad quam faciem est hoc Pomponij:

Simile est quasi cum in calo fulgit propter lunam lucifer.

Nam manifestò de puella siue puero sermo est. Eodem modo Titinnius alibi: *Formica pol per simile est rusticus homo*. Neque refugerunt Plautus, Virgilius, alij: apud quos exempla similia passim obuia, aut certè reperit in libro suo Marcellus extrito s, tali Setia: quod more maiorum factum caudex ille non sensit. Atque hoc primùm. deinde ex illis verbis morem

antiquum elicio laudandi nouam nuptam: ita enim ferè accinebant. **N V L L A T E H O D I E P V L C R I O R.** Id diligenter obseruauit in Hymenæo Malij doctissimus Catullus:

Tardet ingenuus pudor.

Quæ tamen magis audiens,

Flet quod ire necesse est.

Sed moraris, abit dies:

Prodeas noua nupta.

Flêre desine. non tibi

Auruncleia periculum est,

Ne qua femina pulcrrior

Clarum ab Oceano diem

Viderit venientem.

Quòd autem nimias laudes à Nemese vindicari & fascino obnoxias credebant; fescenninos statim adiiiciebant præfiscini: hoc est, ad arcendum fascinum, vt rectè interpretatur Festus. Id eadem hac fabula narrauit mihi Titinnius: nam cùm ita laudaret Setinam virginem pronuba, siue quæ alia fuit: interpel-lat altera;

Paulla mea amabo poltud ad laudem addito

Præfiscini.

Ita libri, & nollem virum eruditissimum aliter laudassè. Subiicit Carisius, qui hoc fragmentum conseruauit, explicandi causa: *ne puella fascinetur.*

C A P V T X V.

St. Cautes Terentij Heautontimorumenos correctæ.

HEAUTONTIMORVMENO, Scæna Ain' tu, vulgò legitur:

Enim verò reticere nequeo, multimodis iniuriis

Clitipho

enim
pvl.
Mal-

Clitipho est, neque ferri potis est. Clin. audiendum hercle est tace.

Versu secundo neq. numeri pleni sunt, & stultè Clinia silentium imponit Clitiphoni, qui nullus interloquatur, iam quidem. In ms. Colonienſi lego, *audiendum hercle est. Clit. quid est, tace.* Vnde litterula mutata verum me elicuisse spero.

Clin. audiendum hercle est. Clit. quid? C. St, tace.

Cùm audiendum Syrum Clinia censuisset, ira adhuc ardens Clitipho, quid, inquit, ego audiam scilicet: quæ priusquàm eloqueretur, Clinia gestu & voce eum reprimat. St, silentij nota propria. Poëta vetus: *Harpocrates, digito qui significat st.*

Scæna, *Quid isthuc? x. 3. act. 3*

Vel heri in vino quàm immodestus fuisti! Sy. factum. c h. quàm molestus!

Malim, *actum.* Consternati serui & qui in fallaciis cùm manifestus teneatur paueat sermo est. neque adhuc colloquio se miscuit: vt intelligere possimus supparasitari eum Chremeti. Probant & quæ antè dixit, *acta hac res est, perij.*

Scæna, Ego me non.

M E. Quid? isthuc times, quòd ille operam amico dat suo

c h. Immò quòd amica. M E. si dat. c h. an dubium id tibi est.

Dolor Chremetis postulare videtur: *ah, dubium id tibi est.* & verissimum hoc est ab aliis traditum, inuicem has particulas sæpissimè mutasse. Ita autem vt scripsi, aliàs semper Terentius. suprà hac fabula:

Mille numum poscit. c h. & poscit quidem. s y. hui

Dubium ne id tibi est? Eunuch.

Ne id quidem tacebit Parmeno. P A. oh, dubium ne id est.

Scæna eadem.

—— in me quiduis harum rerum conuenit,

Quæ sunt dicta in stultum, caudex, stipex, asinus, plumbens.

Non moueo controuersiam huic loco: sed dissimulare nolo in ms. reperire me, *cautes*: non, *caudex*. & eam lectionem videri stabiliri verbis Chremetis infra hac scæna,

*Quot res dedere, vbi possem persentiscere,**Ni essem lapis.*Notû illud Virgilij de dura & immiti, *Marpesia cautes.*

CAPVT XVI.

Surdè audire. Surdo narrare. Græca mercede curare. Homo non fescuncia. Correctus Pomponius.

SENTIO me leuiores nonnulla his meditationibus adpersisse, & quæ doctioribus fortasse non videbuntur digna, de quibus admoneantur. Mea tamen hæc sententia est, nihil leue esse, quod iuuentutem & bonas litteras quoquo modo doceat, neque, vt in veteri verbo est, sit crambe repetita. Quale fortean hoc erit, quod notauimus illustrando loco Terentij *Heautontimorumenos*:

Ne ille haud scit quam mihi nunc surdo narret fabulam.

Prouerbij originem quærebam. Nam Erasmus hîc ariolatur, hospitem in surdum incidisse: multa eum diu nequiquâ rogasse: eam rem consciis risui ac mox dictorio fuisse. scio ita fieri solère, & nescire mallet: verùm lubet arbitrari, eum frustrâ fuisse. Qui alterum loquentem parum attenderet; siue vecordia animi, siue quòd alibi esset: *surdè audire* vulgò dicebatur. Id didici ex Afranio: *in Q. Opusculo*

Amentes [quibus animi non sunt] integri,] surdè audiunt.

Inclusa

Inclusa his notis [] dele in Carisio, apud quem hoc *en' fur* fragmentum exstat. Sunt enim irreptitia. Idem indicat manifestius Propertius:

*Ab pudeat, certè pudeat: nisi fortè, quod aiunt,
Turpis amor surdis auribus esse solet.*

Et Plautus Casina:

*Sed vxorem ante adis eccam. hei misero mihi
Metuo, ne non sit surda atque hac audiuert.*

Amans differri se sermonibus hominum non audit, vecordia animi: at ille Plautinus optat vxorem alibi cogitationibus fuisse, ne inaudierit verba sua. Ut igitur, qui hoc modo verba exciperet, surdè audire: ita qui illiusmodi homini loqueretur, surdo narrare dicebatur. Liuius 111. Historiarum. *Haud surdis auribus dicta: impressione vna totum equitatum sudère.* Ad dam non grauiora alia, Plautus Afinaria:

Cetera quæque vti volumus Græca mercamur fide.

Non minus venustè Afranius, *Græca mercede curare: Pompe* cum in emptione repræsentatur pecunia, non in diem est. Verba apud Nonium in Occupare, leuiter à me emendata.

———*quæ tuleram mecum millia decem*

Victoriatum Græca mercede illico

Curaui, vt occuparem.

Ab eodem in Senica versus hic adducitur:

Pappus hic medio habitat senica non fescuncia.

Lego, P. his in adibus h. f. n. fescuncia. Ut Afranius, *homo non nauci; Næuius, non quisquilie; Varinius apud Ciceronem, non semisis; Plautus, non asis, non trioboli:* ita hîc Pomponius, *non fescuncia* dixit, de eo qui nihili & nullæ rei esset,

CAPVT XVII.

Rota fortuna. Peculiares serui & ancilla. Tunica laxa. Tibullus illustratus locis aliquot.

VETVS verbum est, *dies diem docet*: ita in his literis scriptor scriptorem explicat. Id aded in mentem mihi venit è Tibulli versu lib. I. Eleg. V.

At tu qui potior nunc es, mea furti caueto.

Versatur celeri fors leuis orbe citò.

Ita è suis excerptis vir doctissimus emēdat. Sed haud dubio è glossēmate irrepsit illud, *citò*: & vera antiqua lectio est, *orbe rota*. De eadem fortunæ rota M. Tullius in Pisonem: *Cùm collega tui domus cymbalis & cantu personaret, in quo ne tum quidem, cùm illum suum saltatorium versaret orbem, fortuna rotam pertimescebas*. Itaque etiam apud Plautum Truculento, *u. Ad fores auu.*

Verterunt sese memoria, stultus qui id admiretur.

reponendū arbitror, quod in suis mss. repperit Lambinus, sed quid cofaceret non vidit. *Vertit sese rota vicissim, stultus qui id admiretur.*

Suprà lib. I. Elegia III.

At circa grauibz pensis affixa puella

Paullatim somno fessa remittat opus.

Vt adolescentulis seruuli custodes dabantur, ita puellis seruulæ, quæ in lanificio vnà essent, eas sectarentur & curarent: ij eaq̃ue, vt Iurisperiti loquuntur, peculiares illis plerumque erant, hoc est in peculio. Captiuus:

Vendiditque patri meo te sex minis. is te mihi

Paruulum peculiarem paruulo puero dedit. Persa:

Sophoclidisca hæc peculiaris est eius Qud ego missus sum.

Et verò quæ curabant puellam aut in lanificio vnà erant seruolæ, Latinè circa illam esse dicuntur. Exemplum

emplum hîc in Tibullo habes, & Terentij Eunuchos:
Abducit secū ancillas: pauca quæ circum illā essent manent
Novitiæ puella.

Lib. I. Elegia V I.

Tunc procul absitis, quisquis colit arte capillos

Effluit effuso cui toga lapsa sinu.

Rectè mutauit acutissimus Scaliger, cui hoc Gratia-
 rum poëticarum sodalitium æternū debet, *laxa:*
 eiūq; emendationi fulciendæ locus vnicus est infra:

Nunc si clausa mea est si copia rara videndi

Me miserum, laxam quid iuuat esse togam.

Laxæ togæ & ad talos demissæ tunicæ probro erant,
 vt argumenta libidinosi & mollis animi. Cicero In-
 uectiua secunda: *Quos pexo capillo nitidos & imberbes*
aut bene barbato videtis, manicatis ac talaribus tunicis, ve-
lis amictos non togis. Plautus Pænulo:

Sanè genus hoc mulierosum est demissiciis tunicis.

CAPVT XIX.

Frater cibarius. Cibicida. Amicus ferentarius. Varronis
fragmentum emaculatum & cum altero compositum.

Ex Varronis Saturæ ὀν & λύρας Nonius hæc addu-
 cit in Verutum,

Acerbus, qui tibi nihil mali fecerunt verutis ob artem præ-
claram.

Vt quidem hætenus leguntur, nulli rei; & non in-
 tellecto murmure verius quàm aliqua, obscura sal-
 tim, sententia. Vide tamen, si illis lucis quippiam
 correctione nostra accesserit. Lego enim, *ac ceruos q.*
r. n. m. f. verutis. ob a. p. Emendationi huic fundus
 est locus alter ex eodem libro laudatus à Nonio in
 Venabulum: *Nempe sues syluaticos in montibus sectaris*

vena-

venabulo, aut cervos. Nam, audeo dicere: nihil verius, quàm hæc ita cohesisse.

Nempe sues syluaticos in montibus sectaris venabulo; aut cervos, qui tibi nihil mali fecerunt, verutis. ob artem præclaram!

Insectatio rei venaticæ est. Ex eodem libro adfert Nonius:

Tuus autem ipse frater cibarius fuit Aristoxenus.

Fratrem amoris & amicitiae significationem habere notum est: hinc eleganter Varro fratrem cibarium dixit, qui congerroni suo impendio victum curat, ei-que tamquam pro cibo est: contrà qui aluntur, cibicidas Lucillius pari venustate nominat, lib. xxvii. *Viginti domi an triginta vel centum cibicidas alas.* Ita Plautus iocosè amicum ferentarium vocat, qui repentè opem fert & auxilium egenti amico. *Trinumo: x. Minus*
 ——— nam illum tibi xv dies

Ferentarium esse amicum inuentum intellego.

Quo loco allusit ad ferentarios notum genus militum in exercitu Romano.

CAPVT XIX.

Quid nisi. Tempori. Andria Terentij versus tres de coniectura constituti.

SCÆNA, Quid ais Byrrhia?

Quid tibi videtur? adeon' ad eum? B. quid ni? si nihil impetres

Vt te arbitretur sibi paratum mæchum si illam duxerit.

Æstuant priore versu interpretes & variant libri: sed meo animo nō pessimè restitui, interpunctione paululum immutata. *adeon' ad eum B. quid nisi? nihil impetres; Vt te arbitretur; &c. Quid nisi vetustè, quod nos terimus*

mus

mus *quid ni.* Vfus eo vnicus Terentianæ venustatis amator Afranius. *in Epistula, apud Terentium*

Me auctore mater abstinebis. quid nisi.

Mox subintelliges, *si:* vt frequenter & pereleganter Latini. Menæchmis: Nam absque te esset, hodie numquam ad solem occasum viverem. Si nihil impetres ait; *ego uobis*
at metum certè iniicies parati adulterij.

Scæna, Adhuc Archillis.

Atque aded in ipso tempore eccum ipsum obuiam.

Libri mss. adiiciunt, Chremem: & disertim interpres vetus idem agnoscit. Quare nemo mihi quidquam credat, ni scribserit Terentius:

Atque aded tempore ipsum eccum obuiam Chremem.

Tempori idem quod oportunè, tempestiuè: idemque efferebant, tempore; vt heri here, vesperi vespere, luci luce, mani mane. Epidico:

Aedepol ne istam tempore gnato tuo sumus

Pramercati.

Vulgaria lectio ab interpretis verbis deprauatis manauit: quæ ita restituo. *Quid aliàs] cur aliàs. Tempore] in ipso tempore, in ipsa oportunitate, in ipso articulo.* Eadem labes contaminauit, vt mihi quidem videtur, locum eiusdem huius fabulæ, Scæna vltima:

——— C H. *saluos sum si hæc vera sunt,*

Colloquar. P A. quis homo est? Charine in tempore ipso mihi aduenis.

Scripti plerique omnes duabus vocibus hîc auctiores sunt, *Adibo & colloquar:* quas homines religiosi, quòd versus excurreret, recipere non sunt ausi. atqui inducto glossemate nihil negocijerat & versui & iniuria loco motis subuenire, hoc modo:

Adibo & colloquar. P A. quis homo est? Charine tempore mi aduenis.

Et hæc

Et hæc probabo doctis fortasse: ceteri quid probent
quid improbent manum non verterim.

CAPVT XX.

Plautus Asinaria emendatus.

ASINARIÆ Plauti scæna prima senex, à seruo
per salutem suam suorumque adiuratus, ne verum
reticeat, ita respondet:

Per Dium Fidium quæris, iurato mihi

Video necesse esse eloqui, quidquid roges.

Ita me obstinatè aggressus, ut non audeam

Profectò, percunctanti quin promam omnia.

Primo versu sententia heret. nihil enim per Dium
Fidium seruus quæsierat. itaque mutârunt alij, *quæ*
quæris: ego vnius litteræ mutatione malim, *quæ vis*. Ita
me Dius Fidius amet, inquit (per eum autem deum
iurat ex more, quòd sub dio esset) necesse esse video,
eloqui me tibi omnia, ita me obstinatè aggressus es.
Adiurauerat illum nempe per suam & suorum salu-
tem, quæ obtestatio veteribus sanctissima erat. Ap-
puleius Milesiarum 11. Sic ille commotus: *sed instantia*
Byrrhene, quæ cum adiuratione suæ salutis ingratis cogebat
effari perfecit ut vellet.

Scæna, Hercle verò.

Metuo ne ille obscenarit meæ falsæ fallaciæ.

Laudat aliter Nonius, *Et vocum illic obscenauit.* Corru-
ptè, nemo negat: sed vnde nescio an verum elicue-
rim, *Ecquo nunc illic obscenauit.* Ecqua, inquit, ille re
mihi fallaciarum comitia vitiauit. Illic antiquè pro
ille, ut omnes norunt. Terentius: *Quam illic qui petit*
vnde is sit thesaurus sibi.

CAPVT XXI.

*Tricari. Tricones. Reposcones. Abundare voluptatibus.
Turpilij fragmenta emaculata.*

THESAVRVS mendorum Nonius est: quantumvis inde multa tollas, plura semper supererunt. Turpilij in eo reliquias quas persanavi, volui quidem certè, iam dabo.

In Sublegere.

*Turpili. Boëthun. Qui verba venatur mea pestis, ars
cedat & sermonem hinc sublegat.*

Rectè vir doctus, arcedat. Ego isthoc addo, vidèri *malij*
& præcedentia malè affecta, legendumque:

———qui verba venatur mea,

Postis arcedat, & sermonem hinc sublegat.

Postis pro *postes* scriptum in errorem induxerat eundem illum, qui pro *accedat arcedat ἀρχαίων* exaratum non viderat. Ita autem ferè & Terētijs Phormione.

In Obsequela.

*Turpilius Epiclero. Neque offerre hunc diutius errari &
conqueri necesse sua obsequela.*

Arbitror scribisse poëtam, Neque ferre hunc diutius *tricari* & conqueri, Nec esse *sua obsequela*. Tricari est creditorem delectando frustrari, & spe inani ducere. Tricones enim mala & impedita nomina dicuntur. Lucillius:

Luci' Cotta senex, Crassi pater huius PanatI

Magnus trico fuit nummarii solucere nulli

Lentus.

Quo in loco multum risi Nonium. Lentus nulli solvere est eo ipso quod soluat nulli malè audiens & infamis. Lentum nomen, idem quod malum. Ad Atticum: Teueris illa *lentum sanè negocium*. Contra reposcones.

scones Ammiano flagitatores sunt, qui assiduo con-
uitio creditum repetunt. libro x x i i. *Aegyptij contro-*
uerfi sunt & reposcones acerrimi.

In Legere.

Turpilius Epiclero. Quoniam legere te optimum esse at-
que aquisimum: qua cum vegeta atas & iubendum
esse tibi.

Verba sunt adolescentem cohortantis ad accipien-
dam condicionem vxoriam. Ea sic corrigo, & in se-
narios, vnde excidêre, repono.

Quom legere te esset optimum atque aquisimum,

Qua cum vegenda atas & viuendum est tibi.

Vegere ætatem eleganter dixisse arbitror, pro exhila-
rare & iucundè traducere. Pomponius: *Animos Venus*
veget voluptatibus.

In Caries.

Turpilius Leucadia. Ciperi, viden vt osculatur cariem?
num illunc illac pudet?

Scribe, meo periculo: *Hei perij.* Fons mendii, quod ei
pro hei scriptum fuit, & *per I,* pro *perij.*

In Immortalitus.

Turpilius Hetara. Satine vt meum cor voluptatibus dat,
immortalitus se obtulit mihi hæc facultas.

Emendo: *Satine vt meum cor voluptatibus*
Abundat? immortalitùs sese obtulit
Mihi hæc facultas.

Abundare voluptatibus multi vsitârunt; nec pote
quicquam venustius. ita propemodum ipse Turpi-
lius Philopatro:

Mira lenitudine ac suauitate abundat.

Neque mirabitur euanuisse syllabas duas, similitudi-
ne antecedentium deceptis librariis, qui scriptos li-
bros triuerit. Stare voluptatibus, ferri hîc non po-
test.

*in capta
anno 1715
quinto die 2. lib 5.*

test. Nihil enim minus quàm stat cor cùm gaudio
delibutum est : fuit potius & lubrico quodam hu-
more quasi perfusum abundat. Tum semper hor-
rorem aut neglectum, certè quietem verbum standi
significat: vt in illis ipsis exemplis, quæ à viro docto
huc conferuntur, Titinnij, Sisennæ; præterea Virgi-
lij illo, *Stat puluere calum.*

Lipius

CAPVT XXII.

Correctus Plantus Casina & Mostellaria:

CASINÆ Scæna, Sine modò rus veniam.

Recessim cedam ad parietem: imitabor nepam.

E Festo colligo veterem scripturam & germanam ef-
se, *Recessim dabo me ad parietem.* Dare se aliquò aut
alicunde vſitatum Plauto & eius seculi scriptoribus.
Mostellaria, Scæna Hocanno.

Clanculum ex ædibus me edidi foras.

Malim, *me dedi foras.* Eadem Casina, in commemo-
ratione flagitiosæ turpitudinis, quam Stalino in se
admiſerat: *se. Maximo ego*

Etsi malum merui, hac dabo protinam me infugam. c l.
heus Stalino

Amator. s t. occidi! reuocor.

mss. Langij paullo aliter. c l. *sta loco.* Non dubitabis
verum esse, *sta eloco.* Eloco idem esse quod illico su-
pra docuimus.

CAPVT XXIII.

Fragmenta Turpilij aliquanta restituta.

PAVCA etiam num mihi superant in Turpilio
apud eundem Nonium. In Præstolat.

E 2

Turpil:

*Turpil. Pedio. Ego præstolabo illi, eo citante opicium
Corrige, illico hîc ante hospitium. In Condemnare.*

*Turpilus Leucad. Et amplius illam apparere condecet:
quandoquidem voti condemnata est.*

*Tentabam legere, Etiam thus illam apparare. Loquitur
enim de apparatu rei diuinæ.*

Accusat. pro Ablatiuo.

*Turpil. Epiclero. Sed vola, vt familia nostra officia fun-
gatur sua.*

Rectius existimo esse, Sedulo vt. Ibidem:

Turpil. Vis me potiri? fac ergo potiar quod volo.

Fuit cum mutarem, *Vis me largiri:* sed destiti. Verba meretriculæ sunt ad amatorem inanem, qui verbis se postularet satis facere. Vis me, inquit, ductare: at tu argentum cedo. Adiiciam capitis supplendi versus duos ex eiusdem Turpilij Pedio, quos à Nonio in Leniuit & Intui adductos rectè, ni fallor, compuli:

Quando quidem amorem intercapedine ipse leniuit dies:

Tamen oculi longa intercapedine appetunt cupidè intui.

Tametsi, inquit, amorem tempus & interuallum loci exstinxerit: tamen videre multò post quam ama-ueris, volupe est. Lepida mehercule sententia, & quam homines belli ῥήγωνται veram esse non negabunt.

CAPVT XXIV.

In A. Gellio pauca animaduersa: & correcti versus Ceciliij.

PRÆLVCET nobis tamquã facem exemplo suo in hoc miscellaneo scribendi genere scriptor Atticarum Noctium: solus ille quidem ex tanta copia criticorum veterum reliquus; neq. tamen melius quàm ceteri boni auctores ab imperitis librariis acceptus.

Exjjs

Ex iis vulneribus paucula perfanavi, libro II. capite XXIII.

Nihil dicam ego quantoperè differat versus vtriusque eximius: sit satis aliis ad iudicium faciendum exponi.

Vitium & in verbis est & in interpunctione. Lego, N. d. q. differant: versus vtriusque eximios sit satis &c. Ibi-
dem paullò infrá:

*Quódque Menander praeclarè & appositè & facetè scri-
bfit, ea Cæcilius nequaquam potuit & quidem conatus
enarrare: sed quasi minimè probanda pratermisit, &
nescio quasi mimica inculcauit.*

Ita editiones veteres: recentiores emendarunt, nescio
que mimica: ego, nescio quæ à se mimica: haud dubiò
verè. Cùm, inquit, Cæcilius leporem Menandri non
assequeretur, sua nescio quæ leuia & histrionica eo-
rum vicem supposuit. Mox Cæcilij versus ita vulgât:

Sed tua morosa ne vxor quæso est? quam rogas?

Qui tandem? tædet mentionis, quæ mihi vbi domum

Adueni, ac sedi, extemplo suauium datat ieiuna anima.

*Nihil peccat de suauio vt deuomas vult quod foris po-
taueris.*

Emendo & repono in numeros ita:

Sed tua morosa ne vxor est quæso? an rogas?

Qui tandem? tædet mentionis; quæ mihi

Vbi domum adueni, assedi, extemplo suauium

Datat ieiuna anima. Nil peccat suauio

Vt euomas vult, quod foris potaueris.

CAPVT XXV.

Aliuta. Afferere. Rudente Plauti duûm locorum correctio.

RVDENTE Plautina, principio prologi, his ver-
sibus:

*Qui est imperator diuūm atque hominū Iuppiter,
Is nos per gentes alium alia disparat.*

magna mihi suspicio est, excidisse vocem antiquam,

*& scribendum esse, alium aliuta disparat. Aliuta anti-
quē est aliter: vnde hoc in legibus Numæ regis; Si
quis aliuta faxit, ipsos Ioui sacer esto. Eadem, Scæna
Nunc id est:*

Nec vlla specula est, quæ salutem asserat.

Omnino rectum esse existimo, *quæ salutem asserat.*
Spes salutem non adfert, sed promittit: animo certis
rationibus inducto. Asserere autem confirmare est,
caussis cur ita sentias expositis. Cicero Lælio: Ni-
hil igitur asserunt, qui in re gerunda senectutem versari
negant.

I A N I

IANI GVLIELMII
 VERISIMILIUM
 LIBER TERTIVS.

CAPVT I.

Interdare. Bonis emungi, eluere. Offrenari. Plautus Captiuus emendatus, & si fortè, Rudente.



Vs a s ipsas mihi demereri videor, Plauti vulneribus cum medeor. neque immerito fortasse: si verum est, quod viri doctissimi affirmarunt, eas, si Latinè loquerentur, Plauti verbis sermonem texturas fuisse. Ea re lubens meritò feci Captiuus eius aliquot malè affectis membris remedium vt properarem. Scæna, Iniicite huic actutum.

*Quando ego te exemplis pessimis excruciauerò,
 Atque ob sutelas tuas te morti misero
 Vel te interiisse, vel periisse pradicent,
 Dum pereas, nihil interdico, dicant viuere.*

Versu postremo emendo, *Dum pereas, nihil interduo.*

Nihil interdare, susque deque facere est *ἡ ἀπαγορεύειν.*

Sic idem Plautus ciccum, floccum non interdare in eadem significatione vsurpat, Trinumo. *u. Huius ego / u. fin.*

Sed enim tu qui sis, qui non sis, floccum non interduim.

Et Rudente: *u. Quod inu.*

Eluas tu an exungare ciccum non interduim.

Vbi, ne quid dissimulem, malim legi, *Eluas tu an emungare.* Dixerat Charmides: *cho an te pœnitet*

In mari quod elauit, nisi hic in terra iterum eluam?

Alludens ad naufragium suum & formulam, qua decoctores & damnosi bonis eluere dicuntur: cui subiiciens seruulus, mihi, inquit, susque deque est, bonis eluas, quod fortunæ aut luxus est; an hisdem emungare, quod dolis & technis fieri norunt, qui Latine sciunt: & accidisset Charmidi, si vestem mutare induxisset animum. Quamquam non negem ad frictiones & lauationes veterum potuisse respexisse poetam. Ita ut hoc in medio relinquo; ita, nisi admodum fallor, docti non negabunt recte à me constitutum locum Captiuus: ut & hunc, eadem Scæna.

Quod absque hoc esset, qui mihi hoc fecit palam,

Vsque offerre natum suis me ductarent dolis.

Ridiculè interpretatur Lambinus: atqui ipsi commentum placet. Langiani libri, *oferenatum*. tu lege, meo periculo: *offrenatum*. Offrenati dolis, qui veluti capistro ori iniecto dolis deuincti quolibet ductantur. Vsurpat Plautinæ elegantix diligens imitator Appuleius, libro De Asino sexto: *Hunc* (de Cerbero loquitur) *offrenatum vnus offula prada facile præteribis*.

Scæna quæ hanc præcedit:

Ita mihi stolido suis os subleuere offuciis.

eiufdem Langij libri, *stolido vorsus os*. Corrigit Lambinus, *sursus vorsum*. satis audacter meherculè; & propius libros scriptos ego, *vorsutis os subleuere offuciis*.

CAPVT II.

Exsiliij causa solum vertere. Fatiscere. Cicero epistola ad Brutum emaculatus.

SVDDIFFICILE est plurimis bonorum auctorum locis subodorari inculcatam lectionem & à genuina

nuina dignoscere: ita veteratoriè sæpenumero graf-
fara est correctorum licentia. Quin immò falleret sæ-
penumerò & pro vera probaret, absque testibus ido-
neis vetustè descriptis membranis esset. Eiusmodi, si
quis alius, locus est Ciceronis ad Brutum & Cas-
sium, epistola D. Bruti. *Qui si ita se habet, ut quomad-
modum audiebam de Græcio configi cum eo sine periculo
non possit: non ille mihi fugisse à Mutina videtur, sed locum
belli gerendi mutasse. Itaque homines alij fracti sunt: non-
nulli etiam conqueruntur, quod persecuti non sint.* Sine
suspensione mendii, absque libro veteri esset doctissimi
viri & mihi amicissimi Godescalci Steuuechij: qui
rectè, si quid iudico, legit, *sed solum belli gerendi mu-
tasse.* Qui exsulatum ierunt solum mutasse seu ver-
tisse exsilij causa dicuntur. Paradoxo 1 v. *Quos le-
ges exsilio affici volunt, exsules sunt, etiam si solum non mu-
tarunt.* Philippica v. *Habent enim legitimam excusa-
tionem exsilij causa solum vertisse, neque esse postea resti-
tutos.* Ita hic perurbanè ait Antonium solum mu-
tasse non exsilij causa, sed belli gerendi: sic enim sæ-
pè loquitur omissio eo, quod de suo certatim adiece-
re correctores, causa. Mox quæ sequuntur plerique
omnes mss. ita concipiunt; *Itaque homines alij facti
sunt:* idque tuetur & explicat Manutius. Mihi ta-
men litterulæ traiectione eleganter emendari vide-
tur, *homines alij fatiscunt.* Fatiscere est labascere &
ab animi alacritate deficere. Tacitus: *Donec fatif-
ceret seditio & sua quisque in tentoria dilaberetur.* Sed
viderint viri docti; quorum iudiciis & hoc & ce-
teras meas obseruatiunculas libens meritò sub-
mitto.

CAPVT III.

A se spernere. Virtus. Maculam eluere. Fusti pectere. Plautus Stichus correctus & Ennius apud Nonium.

A d Plauti Captiuos, vnde modò discessi, redeo. Scena, Nunc illud est.

Nunc spes opésque auxiliáque à me segregant, spernuntque me.

Propè est vt adfirmem scribisse Plautum, *spernántque se*. Spernere disiungere & segregare est. Exemplum Ennij laudat Nonius in hoc verbo, Hæctoris lytris. *Melius est virtute ius. nam sape virtute mali nanciscuntur ius, atque æquum se à malis sperni procul.* Corri-go & repono in numeros, *Melius est*

Virtute ius, nam sape virtutem mali

Nanciscuntur; ius atque æquum sese à malis

Spernit procul.

Aurea planè sententia, & quàm dolendum esset latuisse in corruptela diutius. Virtute intelligit robur & vires corporis. Glossarium vetus: *Virtus ἀρετή, ἀνδρία, ἰχὺς, δυνάμεις*: aut, certè animi inconsultam ferocitatem. Eadem Captiuus. Scena Quanto in pectore.

HE. *Pol maiores mi antevortunt gaudiis.* ER. *noh irascier,*

Iam ego ex corpore exigam omnis maculas marorum tibi. Langius in mss. suis repperit, *ex corpore exuam*. Non certius meridie lucere, quàm hîc scribendum, *eluam*. Eluuntur propriè è veste maculæ: inde ad animum transtulit etiam Pœnulo:

Inest amoris macula huic homini in pectore

Sine magno damno quæ elui neuti-quam potest.

Scena

Scæna eadem.

Nam hercle nisi mantiscinatus probè ero, fusti plectito.
 Rectius iidem libri, pectito. Ita Menæchmis: pectè os
 pugnis. Et hinc depexum dare Teretio malo multare est.

CAPVT IV.

Actores. Miluina. Externatus animi. Loca lautia. Re-
stitutus Appuleius pluries.

* APPVLEII libro secundo in festiua illa narratio-
 ne Telerephontis malè hæc vulgò leguntur:

Et conuersa Philodespotum requirit auctorem, eique præ-
cepit, bono custodi redderet sine mora premium.

Scribo, requirit actorem. Actores in seruilibus offi-
 ciis, quibus peculium domini & rationes curæ erant:
 qualem se facit ille Asinaria Leonida, qui res rationes-
 que heri Ballionis curo, argentum accepto, expenso, & cui
 debet dato.

Paullò post:

Sic in modum superbi iuuenis Adoni vel musteluacis peplis
laceratus & discerptus domo proturbor.

Portentum verbi hoc quidem, musteluacis: sed vide,
 si rectè diuinaui, vel miselli Acis piplis laceratus. Vt ob
 amorem inquit lacerati sunt Adonus & Acis, alter à
 Marte in aprum conuerso, à Polyphemo alter: ita
 ego petulantiam verbi, pugnis & piplis discerptus,
 lui. Mox:

Sic ille senex lamentabiles questus singulis instrepebat. se-
uire vulgus interdum, & facti verisimilitudine ad cri-
minis credulitatem impelli.

In prioribus malim, questus singultiens strepebat. Dixit
 enim paullò antè: Voce contenta quidem, sed assiduus sin-
 gultibus impedita. Postea certa emendatio est, vulgus
 incertum. Virgilius in re simili:

Scindi-

Scinditur incertum studia in contraria vulgus.

Idem Appuleius libro III.

*Tu ne vltima non cessas subinde lectorum iuuenum capit-
lamenta subripere.*

Nescio an verum sit, *Tu ne miluina*: vt ad rapacita-
tem eius auis alludat, vt & Q. Frater apud Cicero-
nem: *Renunciatur mihi Licinium plagiarium cum suo pullo
miluino tributa exigere.* Ita Plautus vehementem cibi
appetentiam miluinam nominat, ab eiusdem auis
edacitate. Menæchmis:

Madida quæ mihi apposita in mensa miluinam suggerant.
Eodem libro.

*Sic exterminatus animi attonitus in amentia vigilans
somniaham: defrictis adeò diu populis an vigilareni
querebam.*

Lubens legerem, *externatus animi.* Catullus:

—— *assiduis quam luctibus externaui*

Spinosas Erycina serens in pectore curas.

Postea scribo, *pupulis*: postulante sententia. Aliquan-
to post:

*Atque ego rebar &c. equum illum meum hospitium ac lo-
ca lauta mihi præbiturum.*

Lego, *loca lautia*. Innuit ea quæ Romæ legatis præbe-
bantur loca lautia. Liuius XLVII. *Consulti ab M. Iu-
nio Cos. patres, stantibus in Comitio legatis, an loca lautia,
senatûmque darent, nullum hospitale ius in iis seruandum
censuerunt.* Et corruptus in hoc verbo etiam aliàs; sed
locus nunc non succurrit; Appuleius.

CAPVT V.

*Sparti. Tages. Emaculatus Censorinus, & fragmentum
L. Attij.*

LVCULENTVS scriptor Censorinus est, quem-
que

que magnoperè intererat rei litterariæ minus aliquando deprauatum manibus eruditiorum. In eo non longè à principio vulgò editur:

In quo non ut plerisque mos est aut hic aperta philosophiæ præcepta ad beatè viuendum quæ tibi scriberem mutuatus sum.

Optimus liber ms. paullò aliter, aut ex hic apertè. Manifesta veritas legendum esse, aut ex ethica parte philosophiæ: & id vincunt planissimè quæ inibi sequuntur. Mox sub finem capitis tertij:

Vt in Arcadia fertur regione Erichthonius humo exortus: & in Colchide vel Bæotia consitis anguis dentibus armati partus.

Idem liber, dentibus armatis partotoc. Quod tamquam manu me duxit ad eruendum verum, armati spartoc. Spartoc, siue mauis σπαρτοί, mythologis non Græcis modò sed & Latinis dicti fratres Cadmei & in Colchis satù dentium enati. Varro rerum humanarum x x v. Ego Sparta apud Homerum non plus spartum significare puto, quàm Spartos qui dicuntur in agro Thebano nati. Meminit & Ammianus libro x i x. etiam Euripides cùm aliàs, tum Phœnissis his versibus:

χθρὼν δ' ἀντὶ καρπῆ καρπὸν, ἀντίθ' αἵματος
αἶμ' ἦν λάβη. βεῖται δ' ὀμυρῇ
γῆν, ἥ ποθ' ὕμιν χρυσοπλήληκα σάχυν
σπαρτῶν ἀνῆκεν. ἐκ γῆρας δ' εἰ δειθαιεῖν
τεδ', ὅς δ' ἐσθλὸν γένος ἐκπέφυκε παῖς.
σύ δ' ἐνθαδ' ἡμῖν λοιπὸς εἰ σπαρτῶν γῆρας,
ἀκέραιος, ἐκ τε μητρὸς ἀρσένων τ' ἀπὸ.

Versus penultimi translatio L. Attij etiam nunc exstat à Nonio conseruata, in Antiquior:

Attius

Attius Phœnissus ab dracontis : surpe amata exoratus genere antiquior.

Quis non videt, quàm hæc corrupta? olim aliter, iam proximè ductum litterarum malo corrigere:

—————*ab dracontis es*

Stirpe armata exaratus, genere antiquior.

Exaratus, si rem spectes, *αρατός* est. agrum enim confitum qui dicit, eundem aratum, vt Grammatici loquuntur, adsignificat. Reponendum id verbum hoc quoque Cenforini loco paucis interiectis verbis:

Nec non in agro Tarquinienſi puer dicitur diuinitus exoratus nomine Tages.

ms. *diuinitus exoratus*. Quis dubitet verum esse, *exaratus*. M. Tullius De Diuinatione 11. Tages quidam dicitur in agro Tarquinienſi cùm terra araretur, & sulcus altius esset impressus, extitisse repente & eum affatus esse qui arabat. Vide porro quæ sequuntur illico & Ammianum Marcellinum libro xxi.

CAPVT VI.

Tentio. Tentigo. Tendere. Mors Aristotelis. uoies Morta. Ex eodem Cenforino menda aliquot sublata.

EIVSDEM Cenforini, vbi de seminis profluentia philosophorum controuersas opiniones recenset, locus ita vulgatur: Hipponi verò Metapontino, siue, vt Aristoxenus auctor est, Samio ex medullis profluere semen videtur, idque eo probari quod post admissionem (ita rectè ms.) medullis utpote exhaustas non reperiat: sed hanc opinionem nonnulli refellunt, vt Anaxagoras, Democritus, Alcmaeon. hi enim post Græcam contentiõnem non medullis modò, verùm & adipe multaque carne mares exhauriri respon-

respondent. In quibus verbis, quid sibi velint illa, *post Græcam contentionem*, nullus video: & mirum, ni vera est coniectura mea, *post gregum contentionem*, siue potius, vt Palmerio nostro videbatur, *tentionem*. Vitiando loco fuit cognatio litterarum C. & G: quæ in multis promiscuè & scribebantur & efferebantur. Sic eadem esse cerro, gerro; calbei, galbei; acetare, agitare ex Grammaticis notum est. Græcum ergo pro gregum antiquè scriptum cùm offenderet nescio qui tenebrio, loco nebulam quam dispulimus offudit. Tentionem accipio ὀφθαλμὸν εἰς σωφροσύνην. tendere enim in obscænis est: vnde tendere qui libidinantur, & tentigo ὁ πειρασμὸς in carmine Ithyphallico.

Idem Censorinus Capite V.

Aristotelem Stagiriten reperit: sed hunc ferunt naturalem stomachi infirmitatem variâsque morbidis corporis offensiones adeò virtute animi diu sustentasse, vt magis mirum sit ad annos LXXI. eum vitam pertulisse, quam vltra non pertulisse.

Primùm tẽ repperit syllaba vltima in ms. in litura erat. vnde mihi suspicio est fuisse, *reperio*. Reppererat quod scribit lectione veterum βιογραφῶν: è quibus Diogenes prodidit Aristotelem cùm annos tredecim in Lyceo scholas habuisset, secessisse in Chalcidem, ibique anno ætatis sexagesimo tertio morbo esse confectum. Postea malim scribi, *quam vltra non protulisse*. Suauior enim est παρονομασία & sententia apertior. Mirum ait esse, perseverare in vita eo vsque potuisse; tantum abesse, vt etiam porro eam extendere potuerit.

Idem Capite IIX.

Nam vt alia occasum alia stationem faciant, nòsque omnes

omnes hac sua disparilitate pariter afficiant solis fieri potentia.

Locus vix suspectus vitij: sed optimæ membranæ habent, *hac sua disparilitatem peritura.* Vnde non difficile fuit elicere: *disparili temperatura.* Dispariter astra temperata sunt, ab iisq̃ue nos omnes afficimur, sed non pariter siue eodem modo, quod tinnit vulgata lectio, sed diuersimodè.

Idem Capite I X.

Sunt autem hæ particula in vnoquoque signo tricena, totius verò Zodiaci numero CCC LX. hæ μέγν Græci vocant, & hæ particule nobis veluti fata sunt.

Plinius ms. *hæ μοίρας Græci cognominarunt: eò videlicet, quod eas fatales nuncupant μοίρας.* præclare; leuiter tamen iminuto, *quod deas fatales.* μοῖραι Parcæ sunt. Apollodorus: ἐκ μὲν οὖν Δέμυδου τῆς ἑραν γεννᾶ (ὁ Ζεὺς) θυγατέρας, ὥρας, εἰρήνην, δίκην, μοίρας κλωθῶν, λάχεσιν, ἄτροπον. Addo isthuc μοῖραν vetustissimos Latinos Mortam transtulisse. Liuius Odyssea:

Quando dies adueniet, quem Morta profata est.

CAPVT VII.

Rata vota. Resignare. Lana. Discingere. Emaculati versus aliquot Martialis.

ELEGANS, meo animo, poëta Martialis, & è quo festiuitatis & eruditi leporis multum haurire est: fuisset tamen haud dubio aliquantò amplius, si morem maiorum æmulari, quàm sæculum suum imitari; & sua interdum quàm epigrammatum lingua loqui maluisset. In eius libro I X. quædam non magnæ rei quæ sparsim notauimus studiosos poëtes non celabo,

Epigram-

Epigrammate x i i x.

*Latona venerande nepos, qui mitibus herbis
Parcarum exoras pensa breuēsq̃ue colus,
Hos tibi laudatos dominorum voce capillos
Ille tuus Latia misit ab vrbe puer.*

Versu tertio in ms. erat quem ab optimo & eruditissimo theologo Iacobo Huttero habui, *domino rata voce*. Non dubitabis, quin scribendum sit, *Hos tibi, laudatos domino, rata vota c.* Ratum votum, cū is quē damnas voti est sese exsoluit: quod hīc facit Earinus, misso ad Apollinem capillitio.

Epigrammate x x x v i.

*Verba ducis Daci Cattis mandata resignas
Victricem laurum quam venie ante vides!*

Nihil principi Dacōrum cum Cattis, & benē idem liber, *cartis mandata*. De epistolis poetam loqui clamat verbum illis propriū, *resignas*. Adeò, inquit, impudenter garrulus es Philomuse & mendax, vt principum quoque remotissimorum secreta litteris commissa non ignorare videri velis.

Epigrammate l.

*Dum noua, dum nitida fulgebat splendida Lana,
Dūmque erat auctoris nomine digna sui.*

ms. *leua*. Suspicio rēponendum esse, *lena*: quod integumentum exterius est, & ab ea parte splendor togæ conspicuus.

Epigrammate c i v.

*Peltatam Scythico discindit Amazona nodos
Addidit Arcadico terga leonis apro.
Aeripedem syluis ceruicū, Stympthalidas vndis
Abstulit, à Stygia cum cane venit aqua.*

Optimè ms. *discinxit Amazona*: hoc est, vt interpre-

tatur Aufonius: *Threiciam sexto spoliauit Amazona balteo*. Deinde idem liber habet, *Stymphalidas astris*: ad historiam aptius. nam volantes eas Hercules deiecit. Seneca:

Solitâsque pinnis condere obductis diem

Petiit ab ipsis nubibus Stymphalidas.

Neque tamen malè vulgati. Stymphalum enim fl. istæ furia habitabant.

CAPVT IIX.

Exefficio. Curiosi, prouerbium. Correcta fragmenta Afranij & Nauij: & illustratus Plautus.

NONIVS in Extundo.

Afranij Epistula. Atque adeo extundo, ex officio datur mihi custodiendus.

Repone verbum antiquum, *extundo, exefficio*. Truculento: Numquam hoc vno die *exefficias* opus.

In Contendere.

Afran. Epist. Non licet me qua contendisset ita peruenire. Editio vetus, contendissem. Diuido verbum & lego, qua contendi semita.

In Serius.

Afran. Priuigno. Non ego te noui tristem, seruum, seruum.

Malim, *tristem, toruum, serium*: aut certè, quod G. Stewechio placebat, *saum*.

In Caries.

Afran. Priuigno. Nemo illa viuit carie cariosior.

Rectius ms. *curiosior*. Curiosi, vulgi dicterium in graciles & macilentos: quasi ij curis semet conficerent & macerarent. Hoc adieci, vt illustrarem locum Plauti Aulularia. *u. Minus lubet*

Etiam

Etiam agnum misi. E V. *quo quidem agnoscat scio*

Magis curiosam nusquam esse ullam bestiam.

ME. Volo ego ex te scire qui sit agnus curio.

E V. Qui ossa atque pellis totust, ita cura macet.

In Timos.

Nauius Lycurgo. Iam ibi nos aduenientes duplicant timos vapósque.

Corrigit Iunius, *timos Panos*; & intelligit τὸ πανίδν: quod manes eius me condonent, non rectè. Potius litteris transpositis legendum, *timos pauósque*. Vtrumque in exercitu formidolosum esse indicant templa Romæ, Pauori & Pallori iam inde à Tulli regis temporibus sacrata, & Salij Pauorij & Pallorij iræ horum dæmonum auerruncandæ instituti.

In Melos.

Nauius Lycurgo. Suauè summum melos.

leue mendum, sed quod plerosque fugit: corrige, suauifonum melos.

C A P V T I X.

Reprehendere. Omnes inimicos repperire, prouerbum. Rati. Correctus Plautus Epidico, Terentius Andria.

N O N abs re Epidicum suam rantoperè amauit ipse Plautus, fabulam inuentione arguta, sermone terfo & facetiis affluentem: tum omni arte scænica expolitam. Eius primo statim versu:

Heus adolescens. T H. quis properantem me prendis pallio?

E P. Familiaris.

Libenter correxerim, *properantem reprehendit*. Reprehenduntur propriè, quos in via assecutos prehenso pallio remoramur, aut serui fugitiui, cùm è fuga re-

trahuntur. Milite: *Vel illa qua me here pallio reprehenderunt. Bacchidibus:*

Aufugero herclè, si magis vsus venerit,

Si ero reprehensus, mactò ego illum infortunio.

Inde transiitione in aliud se reprehendere Terentio est animum iam iam exiturum quo non opus est veluti retrahere. Adelphis: *sc. et act. 4.*

Sensi illicò, id illas suspicari: sed me reprehendi tamen,

Nè quid de fratre garrula illi dicerem ac fieret palàm.

Ita optimum fragmentum Colonienſe, omninò melius quàm editi libri, me repressi tamen. quod quia tritius eſſet à ſciolis huc inculcatum apparet.

Scena, Rem tibi ſum.

Qui inuident, omnis inimicos mihi iſthoc factorepperi.

Non me fugit, ſententiam hinc elici non incommodam. Placet tamen impenſius, *Quin vide, omnes. &* id aptius ad conſecutionem orationis eſt. Prouerbialiter iactabant, omnis ſe inimicos repperiſſe, ſi quam rem aduerſus multorù, ſuorum inprimis ſententiam aggreſſi eſſent. Terentius:

Per omnis tibi adiuro deos, numquam eam me deſerturum,

Non ſi capiundos mihi ſciam eſſe inimicos omnis homines.

Scena, Malè morigerus.

ST. Ego te ſeruabo. EP. *ædepol nè illi melius, ſi nacti ſuant.*

Sed quis eſt hac muliercula & illic ruiſtellus qui venit.

Non heri aut hodie primùm de hoc loco diſceptatum: ſed iam ante Feſti tempora, quantum video. quid enim aliud cauſæ arbitremur, cur ille hîc modò grauastellus agnoſcat, modò ruiſtellus? vtruinque certè explicat; cùm alterutrum taptum verum eſſe poſſit. Mihi, ſi fas eſt contra veterum Grammaticorum

ticorum auctoritatem niti, suspicio adhesit, fortean olim fuisse:

Sed quis est isthac muliercula & illic rauus: ellus qui venit.

Rauus cui canitie caput iam interspergitur. vnde ra-
uam lupam Horatius dixit pro cana: & Varro, ocu-
los rauos; pro glaucis siue cæsiis. Ellus ελεγκτικόν est,
vt in Terentio: *Andr. act. 5. v. 2.*

Nescio qui senex modò venit: ellum, confidens, catus.
ad quem locum operæ erit videre, quæ notârit Do-
natus. Hanc tamen coniecturam meam vt veram ef-
se non præsto: ita fraudi mihi apud viros bonos &
eruditos futurum non spero, quid mihi leuiter vi-
deretur indicasse.

CAPVT X.

*Tempori. Magis magisque. Scuta proiecta. Emaculata
fragmenta Sisenna.*

IN L. Sisenna magnam iacturam fecerunt Roma-
næ litteræ, non solum historiæ caussa, qua vicit om-
nes superiores: sed etiam linguæ ipsius, cuius bene-
gnarum fuisse & Cicero testatur & indicio sunt fra-
gmenta quasi gustus cuiusdam caussa relicta nobis in
libris Grammaticorum. In iis hæc obseruabam.

Nonius in Manipulus.

*Sisenna lib. I I I. Conuictus tamen & tempora singula con-
stituit, & manipulos sicut steterat obuerti iussit.*

Emendo, & tempori signa constituit e. m. s. steterant.
Tempori sæpè idem quod numero & celeriter. Ru-
dente: *Vigilare hominem oportet, qui sua vult tempori con-
ficere negocia,*

In Discedere.

Sisenna Histor. IV. Armata dextra ducti magisque in latitudinem discedunt.

Scribendum, *Armati d. d. magis magisque in latitudinem.* Elegans eā geminatio, & frequens optimo cuique scriptorum veterum. Ad quod exemplum Aulularia Plautus vsitavit, plus plusque: minus minúsque.

Plus plúsque isthuc sospitent quod habes. Et:

At ille verò minus minúsque impendio

Curare minúsque me impertire honoribus.

Itaque haud scio áne exciderit vocola apud Terentium Eunuchos: *act. 3. r. 5.*

——— *& quia consimilem luserat*

Iam olim ille ludum, impendio magis animus gaudebat mihi.

scribendumque sit, *impendio magis magisque.* Certè eam lectionem neque numeri excludunt, & sententia propè flagitat. Sed ad Sisennam redeo.

Macrobius Saturnal. VI. I V.

Sed & Sisenna in secundo dixit. Et Marsi propius succedunt, atque ita scutis proiectis tectis saxa certatim lenta manibus coniiciunt in hostes.

Corrigo, *scutis proiectis tectis saxa certatim lecta manibus.* Proiecta scuta dixit obtenta & obiecta ictui hostium, & ita accepisse Macrobius docet versus Virgilij: *proiecto dum pede laevo aptat se pugna.*

C A P V T X I.

Oram orationis adhibere. Ora pro rei initio.

Miles Plauti emendata.

MILITE, Scæna Mihi ad enarrandum.

Ego

Ego quanto citius possum mihi nauem paro.

Suspitor reponendum verbum vetus, Ego quantocys possum. Mox:

Vbi sumus prouecti in altum, id quod volunt,

Capiunt prædones nauem illam vbi vectus fui.

Nugæ sermonis, id quod volunt. quis enim existimet eos noluisse capere nauem, quam adorirentur? Censeo corrigendum esse, *illic* aduolant Prædones, capiunt. Fons corruptelæ vicinitas litterarum D & L, & C & Q.

Scæna, Rem omnem.

————meretricem commoneri

Quam sanè magni referat mihi clam est. quin ego me frustra

Postquam admiscere aures tuæ meæ moram orationis

Tibi dixi, miles quemadmodum potis esset deasciari.

Rectè è vestigiis Vaticanani elegantissimus Lipsius, *Aug. 4. 20.*
Postquam adbibere: sententia tamen nihilo magis aperta est, quam immutatione non magna præclarè (quid enim vetat dicere, quod sentio?) restitui:

————meretricem commoneri

Quam sanè magni referat, nihil clam est. quin ego vltro,

Postquam adbibere aures meæ tuæ oram orationis,

Tibi dixi &c.

Meretricem, ait, in maleficio monere nihil opus esse, palam est; vtpote quæ omnes moles maleficarum domi habet. Etenim me vide, quæ tibi, simul exorsus es narrare de circumueniendo milite, vltro modum eius rei perficiendæ ostendi. In prioribus editiones veteres expressi; vnum dumtaxat ausus ex *frustra* facere *vtro*: quod & sententia, & numeri flagitant, neque ita longè abit ab alterius vocis vestigiis. Neque morari hîc lubet, dum ostendam quam ineptè

hactenus libros obsederit, *mora*. Orationis oram adbibere est sermonem degustare: translatione à ripis quæ aquam imbibunt venustissimè ducta. *Et est ora non tantum terra, sed cuiuscunque rei initium*, ait Festus. Cæcilius:

Oram reperire nullam, quam expediam, queo,
Ennius:

Qui potis ingentis oras evolvere belli.

CAPUT XII.

De silicernio notata quæpiam. λίχνοι. Rapere de rogo canam. Bustirapi. Correctæ glossæ veteres. & apud Nonium Varro.

SILICERNIUM notum est conuiuium funebre fuisse: illud fortassis non perinde manibus defuncti ab exsequiis oblatum, neque fas fuisse degustare ex eo quidquam, qui intulissent; sed tantum cernere silentio: vnde veriloquium eius nonnulli deducunt. auctor in Adelphos Donatus, & Glossarium vetus: *Silicernium*, περίδειπνον. λύχνοις ὃ ἀπτεῖν ἐν πένθει ἔδειται. Arbitror enim litterulæ mutatione rectè restitui, λίχνης. οἱ λίχνοι Hesychio ὀψοφάγοι sunt: ij aderant quidem, sed nihil gustabant. Causa cur abstinèrent, ne funestarentur. nam quisquis eorum quæ manibus libantur quippiam siue ederit siue biberit, funestatur. Inde in maledictis & execrationibus, cænam è rogo rapere. Catullus:

Vxor ne Meni, sape quam in sepulcretis

Vidistis ipso rapere de rogo canam:

Cum deuolutum ex igne prosequens panem

A semivaso tunderetur vstare.

Tibullus:

*Ipsa fame stimulante furens escâsque sepulcris**Quærat & à suis ossa relicta lupis.**Et qui lucri caussa nefanda omnia subire non vere-*
*bantur, bustirapi audiebant. Pseudolo: re. Pseudolo: re**—iam ego te differam dictis meis**Impudice. B A. ita est. P S. scelestè. B A. dicis vera. P S.*
*verbero.**B A. Quippini. P S. bustirape. B A. certè. C A. furcifer.**B A. factum optimum.**Neque verò in ipsis tantùm exsequiis conficiebatur*
silicernium; sed instaurabatur quotannis escis ad se-
pulcrum positis, vino defuso & rosis quoque spar-
sim profusis. auctor Seruius in quintum Æneidos,
& inscriptio vetus Torcelli:

LONGIVS . PATRO
 CLVS. . SECVTVS
 PIETATEM , COL
 CENT . HORTOS
 CVM' , AEDIFICIO
 HVIC. SEPVL. IVNC
 TO. VIVOS. DONA
 VIT. VT. EX. REDI
 TV. EOR. LARGIVS
 ROSAE: ET. ESCE
 PATRONO. SVO. ET
 QVANDOQ . SIBI
 PONERENTVR

Dissentit tamen à Donato Seruius in eo, quod à seni-

F s bus

bus absumentum ait, & dictum quasi silicernium. Eius Varro meminit Meleagris, ut laudat Nonius. *Funus exsequiarum cum laude ad sepulcrum antiquo more silicernium confecimus.* Ita in Ms. repperit Iunius: *correxiam olim, cum lauso.* Tria in omni funere præcipua nominat, exsequias, lausum siue, ut nunc enunciamus, lessum, & silicernium.

CAPUT XIII.

Mundus. In mundo esse. Satullè. Eniaculatus Appuleius: item Plautus Persa, & Gellius.

APPULEIUS libro De Asino IV.

Ad hæc anus subirator dicere eam seniore iam vultu iubebat, quod malum fieret, vel quid repente postliminio pressæ quietis lamentationes licentiosas refricaret.

Scribo haud dubia veritate, quid (malum) fleret. Idem libro sexto primore:

Erant & falces & opera messoria, modus omnis, sed cuncta passim iacentia, & incuria confusa.

Lego, & opera messoria mundus omnis. Mundus non muliebris tantum ornatus, sed cuiusvis rei prompta & parata copia: unde vulgatum loquendi genus in mundo esse, de eo quod in promptu & domi ad manum est, nec querendum foris. Ita Plautus mundum rusticum dixit pro hisdem rei rusticæ instrumentis. Mercatore:

Multoperè in mundo rustico se exercitum.

Eodem libro:

Quo metu statim completo caelesti theatro pro sede sublimi sedens procerus Iuppiter, sic enunciat: Dei conscripti Musarum aluo.

Facillima correctio est, *Musarum albo.* Notum est albo

albo significari libros magistratuum. ut igitur Romæ in tabulas à censoribus referebantur, qui in senatum lecti, ideoque patres conscripti essent: ita deos istos poëticos ioculissimè ait in albo Musarum censi; utpote qui commentum poëtarum sint. E diuerso Plauti locum emendandum censeo Persa. Scæna, Veterem atque antiquum.

Si id fiat, ne isti faxim nusquam appareant,

Qui hîc albo rete aliena oppugnant bona.

Rectius enim legetur, meo iudicio: *Qui hîc aluo rete a. o. b.* Caussidicos & forenses rabulas aluo tamquam reti uti ait, & ut in hoc pisces iniguntur: ita in illam bona eos aliis erepta obstrudere & consumere.

Idem Appuleius lib. vii.

Tuceta concinnat, apponit satullè, sed præcipuè poculis crebris grandibusque singulos ingurgitat.

Lego, apponit satullè. Satullè est copiosè & affatim. satullare vetustè satiare est. Varro *περί αἰσθητικῶν*: Neque in pulvere mythico coquam carnes quibus satullem corpora ac famem ventris,

Eodem libro:

Totis ergo prolatiis eruditisque rebus & nobis auro & argento ceterisque onustis.

Legendum, erutisque rebus. Eruerant res à latronibus occultatas atque abditas.

Paullò post:

Puerque mihi præfectus imponitur. Omnibus quidem ille puer deterrimus.

Vera scriptura, ut opinor, est: *Omnimodis q. i. p. teterimus.* Et ita propemodum locum A. Gellij constituo lib. ii. cap. xix. Ex quibus latenter intelligas, non omnes modò diis exosos esse, qui in hac vita cum arumnarum varietate colluctantur. Corrige, *non omnimodò.*

Eodem

Eodem libro extremo:

Cui tandem vel ineptissimo persuadere possis, atrocitatem istam culpa vacare: cum propugnare pedibus & arcere moribus misello puero potueris.

Liquet mihi deierare, scribisse Appuleium: & arcere mordicibus, & respexisse Plauti illud Aulularia: x. Inezigila
Afini me mordicibus scindant, boues incurfent cornibus.

C A P V T X I V.

E Quintiliano macula aliquot sublata.

V s v s sum peruetusto M. Fabij libro, beneficio optimi & humanissimi viri Melchioris Hittorpij, descripto quidem eo vitiosissimè; ex cuius tamen vestigiis multa bonæ lectionis veluti vestigia sagaciter odoranti sese offerant. Argumento erunt paucula quedam ex libri sexti proæinio:

Te ne consulari nuper adoptione ad omnium spes honorum patris admotum, te auunculo Pratori generum destinatum, te omnium spe Attica eloquentia candidatum, superstes parens tantum ad pœnas, amisi?

Primis verbis melius ille, quem dixi, liber: prius *admotum*. Neque enim Quintilianus honoribus vrbani floruit; at adoptione consulari ait filium suum paullo antè quàm moreretur in spem honorum venisse. Postea idem liber: *te omnium spe acutis eloquentia candidatum*. Facilis erat emendatio, *spe ac votis*: at isti correctores Atticam eloquentiam somniarunt.

Paullo pòst:

Boni autem consulere nostrum laborem vel propter hoc certum est, quòd in nullum iam proprium vsum persequeremur: sed omnis hæc cura ad alienos, ut alienis utilis (si modò quid utile scribimus) spectat.

ms. *vel propter hoc cecum est. Emendo, æquum est. Postea, sed omnis hæc curas alienas viles, si modo &c. Vnde haud difficulter elicui, quod verum arbitror: sed omnis hæc cura alienas utilitates. Adiiicit deinde:*

Nos miseri sicut facultates patrimonij nostri, ita hoc opus aliis præparamus, aliis relinquemus.

In ms. erat *præparabamus*. Suspicio scribisse Quintilianum, *properabamus*. Certè elegantius non potuit. Catullus:

Cum Medi properare nouum mare. Plautus Casina:

Hanc tibi nunc veniam minus grauatè propero.

Properasse autem hos commentarios se metu mortalitatis suæ ait ipsemet hoc ipso præmio non longè ab initio.

CAPVT XV.

Pigmenta. Frumen siue rumen. Frunisci. Ruminari. Irrumare. Varronis fragmenta aliquot correctæ: duo compositæ.

E VARRONIS Marcipore Nonius adducit, in Conscribillare:

Æstrologi non sunt qui conscribillarunt pingentes calum. Malim, pigmentis calum. Species intelligit animantium, quas in cælo finxerunt Mathematici, pinxerunt & pigmentis suis illustrarunt pictores.

In Optare:

Diogenes qui amicos qui iussus ab Alexandro rege, optare quid vellet, se facturum.

Corrigo, Diogenes Cynicus, qui. & mox: optare; quidquid vellet, se facturum. Notum votum philosophi est, relatum à Plutarcho, ne sibi apicanti officeret Alexander.

In Of-

In Offendere.

*Dein mittit virile veretrum in flumen: offendit buccam
Volumnio.*

Flagitiosa sententia est: sed scripsit tamen Varro, *Dein mittit virile veretrum in frumen*. Frumen siue rumen est pars colli qua esca deuoratur, inquit Festus: & inde ducta frunisci & ruminari; etiam irrumare, quod quid sit me docere piget: hinc certè nimium Romanè à Varrone explicatum est. Ex eiusdem Manio quæ laudat Nonius in Altus, Prospiciens & Limus, ita olim cohesisse non dubito:

Habes antepositam alimoniam sedens, altus alieno cibo, neque post respiciens, neque ante prospiciens: sed limus intra limites culinae.

Acris obiurgatio desidia est: postremis verbis allusum videtur ad Oeni fabulam, qui obliquus funem torquet, & asinum spartum admordentem præ ignauia non abigit.

CAPVT XVI.

Escendere. Exscendere. Neruius extendere. Cicero, Varro, Festus, Cæcilius emendati.

ASSENTIOR doctissimis viris multa scribisse M. Tullium more maiorum; hoc est, vetustè & minime ad captum nostræ ætatis litteratorum: quorum in libris nec vola nec vestigium, quod dicitur; cum a uorum negligentia, tum bonam partem audacia correctorum. testem dabo locum ex Officiorum lib. III.

Conscribserunt communiter edictum cum pœna atque indicio, constitueruntque, ut omnes simul in rostra post meridiem descenderent.

Quid, malum, hoc monstri? in superiorem locum ut descendatur? nusquam factum reperies: & non certius

tius fuisse Ciceronem, quàm eundem hic scribisse, post meridiem escenderent. qui dubitat, similem locum videat Oratione pro lege Manilia, siue; eadem enim est; de imperio Cn. Pompeij:

Et his temporibus non pudebat magistratus populi Romani in hunc ipsum locum ascendere.

Vbi liquidò habet liber scriptus, qui Coloniae in aede maxima publicitus seruatur: *Et his temporibus nonne pudebat m. p. R. i. h. i. locum ascendere?* & sensu & verbis longè melius & agitur de iisdem rostris. In eodem verbo sæpe peccatum in Varrone De lingua Latina. nos exemplo vno contenti erimus libro IIII. *Tertius gradus est, quo philosophia ascendens peruenit.* In mss. reppererunt viri docti *descendens*. Scribe mea fide, *ascendens*. Addam locum Epistatomo, quem Priscianus adducit libro VII.

Si properas extende huc in meam nauem, ita celeris est. Lego enim & hîc, *escende*: aut certè, *exscende*. nam in hoc verbo & Festi mutilatum locum corrigo: *Excedere, egredi.* vbi ms. Colonienfis, *Escendere*: emendo, *Exscendere*. Vt autem Cæcilij versu extendere migravit in alienum, ita suis sedibus emigravit in Varronis Saturæ ὀνολύας, apud Nonium Neruiæ.

Scientia doceat, quemadmodum in psalterio est, tendamus neruias.

Repono, *extendamus*. Neruias extendere est intendere siue concinnare fides. Hæc commodum scribseram, & communicaram cum amœnissimi ingenij iuvene Gabriele Rolandio, familiari meo: cum animaduerti eodem modo ex Vaticano emendasse locum illum ex Officiis M. Muretum. Quid quæris? gaudius sum non mediocriter posse & nobis pro sententia excidere, quod doctis placeat.

CAPVT XVII.

Flectere comam. Prata. Candida. Trita. Colere. Emaculata multa in Martiale.

MARTIALIS libro II. Epigrammate xxxvi.

Pectere te nolim, sed nec turbare capillos;

Splendida sit nolo, sordida nolo cutis.

liber scriptus, *Flectere*: rectè, si quid iudico, hoc est, intorquere calamistro. Ita libro sequente ex manuscriptis lego:

Bellus homo est flexos qui digerit ordine crines,

Balsama qui semper cinnama semper olet.

Cincinnati capilli & calamistrati Martiali non placent; vt neque impexi & horridi: compositi & pexi, quod inter illa duo tamquam medium est, non displicent.

Epigrammate xlv i.

Florida per varios vt pingitur Hybla colores,

Cùm breue Sicanie ver populantur apes:

Sic tua compositis pellucet prala lacernis,

Sic micat innumeris arcula synthesibus.

Atque vnam vestire tribum tua vellera possunt,

Appula non vno quæ grege terra tulit.

Tu spectas hiemem succincti letus amici,

Prò scelus! & lateris frigora trita times.

Versu tertio ms. *sepositis collucet prata lacernis*. melius omninò. Lacernæ sepositæ sunt impares, quæ rarò sumerentur: quarum affluenti copia subindicat multitudinem parium siue quottidianarum: & eleganter prata appellauit thecas, in quibus parata vestimentorum copia, vt in prato rustico graminum. Mox bene idem liber, *tua candida possunt*: non vt vulgò, *vellera*. Candida absolutè rogæ candidæ sunt: ita paullò

paullo inferius trita dixit pro veste depāni & attrita. *quijn: 58*

Pexatus pulchrè rides mea Zoile trita.

& bellè lacernis, quæ vulgò pullæ erant, togas subii-
cit; quæ albæ aut candidæ. Versus postremus,

Prò scelus! & lateris frigora trita times.

benè habet, testibus libris veteribus & sententia.
Cùm enim trita ita frequentarent, vt modò diximus:
argutissimè vocauit frigora trita vestes, quæ lacerae
frigus vndique admitterent. Ita libro v i i.

Esse queror gelidâsque mihi tritâsque lacernas.

Latus pro sodali & congerrone assiduo vsitauit &
libro v i. *ap. 7.*

Inter Baianas raptus puer occidit vndas

Eutychus ille tuum Castrice dulce latus.

Hic tibi curarum socius, blandûmque leuamen,

Hic amor, hic nostri vatis Alexis erat.

Epigrammate l v.

Vis te, Sexte, coli: volebam amare.

Parendum est tibi; quod iubes colere.

Mancum epigramma publicatur, supplendum addi-
to versu ex libris scriptis:

Sed si te colo, Sexte, non amabo.

Colere terebant pro salute & adsectari patronos &
amicos primores siue magnos. Cicero pro Cælio:
Quo facilius & nostras obire domos, & ipse à suis coli posset.
Trahebatur autem & in rem amorum, & idem erat
quod arari, Truculento:

——— *qui arari solent ad pueros ire melius.*

In hac ambiguitate lusisse poëtam suspicor.

CAPVT XIIIX.

Rinales. Luna aquulenta. Varro apud Nonium correctus.

M. VARRONI hoc capite operam dabo, sed
G saltua-

saluatim & vellicatim, ut ait ille. Nonius in Macescebat.

Varro Serr. *περὶ ἀρχαίς*. Noster Atticus riuallis homo iturus in curiam commacescebat.

Lego, Noster antiquus riuallis domo iturus. Riuales, qui vno riuo vterentur; vicini. Ita verti possent Atheniensium *πράτορες*, siquidem origo vocis ἀπὸ τῶν πρεάτων ducta est. In Nobile.

Varro *περὶ αἰθέσεων*. Tum contremula aquilenta apud alta littora Oiris ac reluces nobilis omnibus.

De luna scripti delicatissimi trimetri sunt. Principium leuiter corrigo, Tu cum tremula, aquulēta. Aquulentam dixit proprio epitheto, quod humorem terris inducat. In Cedere.

Varro Eumenid. Maximum dum cadit ferro sed cedere Vlyssēm

Cum bacca syluam cadit porcósque trucidat.

Emaculandum haud dubiè, Ajax dum credit ferro se cadere Vlyssēm. de Aiace furente *καὶ μαστοπόρῳ* sermo est.

In Bellum.

Varro *ταχὺ ἐνὶ πύλῃ*. In charteo stadio ἐπιταρίων lego, a quo qui certasset animo, bellus homo magis delectatus Stoicorum pancratio, quàm athletarum.

Nescio an scribserit Varro, Agone certasset animi bellissumo. Bellissimum agona dicit esse cultum animi & doctrinae studium.

In Stare.

Varro Flextabula. Atque si addam, quanta misericordia mea heredibus meis stet, quod miseros sublenauerim.

Scribo, quanti m. m. heredibus meis stet: quot miseros s.

In Rutuba.

Varro Sexagesimo. Ergo tum Roma parcè puréq. pu-dentes Vinere tum in patriam nunc sumus in rutuba.

Versu

Versu posteriore lego *Vixere in patria*. Adeò ait degenerasse morem maiorum, vt ipsa Roma iam Roma non sit, sed scelerum colluies.

CAPVT. XIX.

Βῆς ἐν πόλει, *proverbium. Despectare. Hiscere.*
Martialis emendatus.

AD Martialem, vnde modò discessi, redeo. lib. I.
 Epigrammate LXXVII.

Quid tibi cum Cirrha, quid cum Permesside lympba?

Romanum propius diuitiúsque forum est.

Illic ara sonant. at circum pulpita nostra

Et steriles cathedras basia sola crepant.

Omnino melius liber scriptus: *ad circum & pulpita nostra*. Recenset loca poëtis veluti consecrata, circum, in quo ludi fiebant & spectabantur fabulæ; pulpita, è quibus recitabãtur poëmata; cathedras Grammaticorum, è quibus explicabantur. Et urbanè virum disertum à scribendo poëmate deterret, cui vberior quæstus in foro propositus sit. Contrà caussidicum infantem, à foro ad versus vt inopiæ subsidium confugientem lepidè ridet in Apophoretis.

Lemma, Corculum.

Pauper caussidicus nullos referentia numos

Carmina cum scribas, accipe cor quod habes.

Lemma aliter concipiunt libri scripti, & vetustè editi: *Cor bubulum*. Rectè, ni fallor: & allusit ad paræmiam βῆς ἐν πόλει, cum rem urbanam & lepidam aggredditur homo agrestis, & rus merum, quique ei perficiendæ parum idoneus est. Mittit igitur iocosè caussidico cor, sed quale is cui mittitur habet stupidissimi animantis.

Epigrammate LXXIX.

Nec tamen obscuro pia polluit ora veneno,

Dimisitq; animam nobiliore via.

ms. *palluit ora veneno. præclarè. Venenum pallorem inducit, vnde Virgilius de Cleopatra, pallentem morte futura.*

Epigrammate XCVII.

Rogabit, vnde suspicer mollem virum.

Vnà lauamur, adspicit nihil sursum:

Sed spectat oculis deuorantibus draucos.

Scripti, *Despectat.* Despicere in flagitiosis verbis est: vt descendere, Catullo; demisso capite esse, Cicero-
ni; aliis alia.

Libro V. Epigrammate LVII.

Cui tradas Lupe filium magistro

Queris sollicitus diu, rogásque.

Omnes Grammaticósque rhetorásque

Deuites moneo, nihil sit illi

Cum libris Ciceronis aut Maronis,

Famae Lucilium sua relinquat.

Si versus facit, abdicet poëtam.

Artes discere vult pecuniosas?

Fac discat citharædus, aut choraules.

Si duri puer ingenî videtur,

Praconem facias vel architectum.

Viueret Orbilius, malum Martiali in mundo esset. quis enim ita vmquam locutus est? *discat citharædus*, pro *discat cithara*. Sed aut ego vehementer erro, aut à librariis hoc stigma inustum est poëtae, legendum-
que, *Fac hiscat citharædus*. Hiscere conatum loquendi magis significat, quàm loqui. Virgil. *vix pauca furenti subincio, & raris turbatus vocibus hisco.* transfertur ad rem Musicam venustissimè. Propertius: *Tantum ope-*

ris ner-

vis nervis hiscere posse meis. Idem alibi de Apolline cum cithara ad viuum depicto, *visus Marmorea tacitus carmen hiare lyra.* Argutè igitur Martialis, fac, inquit, rude quiddam & indoctum tentet saltem cithara pangere, præstabo, eum rem facturum.

CAPVT XX.

Carmen. Carminare. Plautus emendatus Menæchmis.

PLAVTVS Menæchmis, Scæna Per ego vobis.

Bene autem ora commentaui, atque ex mea sententia.

Mira sunt quæ hic viri docti comminiscuntur, de mento & commentatione. Ego si exemplum haberem, lubens legerem, *ora carmentaui*, aut certè, *carminavi*. Vt ab argumento argumentari: ita à carmento, quod instrumentum lanæ putandæ proprium, carmentari, aut, vt hîc Plautus, Carmentare, videtur fuisse in vsu. Certè vsitata in eadem re, carmen & carminare. Lucretius: *quasi carmine lana trahatur.* Plinius libro 1x. *Quinisq; lana potat horis, rursusque mergitur carminata, donec omnem ebibat saniem.* Benè, inquit seruus, illis os depexui & quasi lanam carminavi: alludens ad id quod Menæchmus dixerat, *Pecte os pugnis.* Hanc tamen emendationem meam veram non præsto, vt neque illam suprâ, Scæna, Vt ætas mea:

Sed hac res mihi in pectore atque corde cura est

Quidnam hoc sit negocij.

leuiter tamen suspicabar scribisse poëtam, *Sed acris mihi in p. a. c. cura est.* Scæna, Si vultis oculos.

*O salue insperate multis annis postquam conspicio,
Frater.*

Ita omnes libri, cùm perspicuè verum sit, *multis annis post quem.*

CAPVT XXI.

Tria Varronis fragmenta apud Nonium composita.

DONATVS Probum ait memoriæ prodidisse à M. Varrone traditum pueros initiari solitos Edusæ & Potinæ & Cubæ diuis edendi, & bibendi & cubandi. vbi primùm ex cunis & à lacte transierunt. Id vbi scriptum reliquisset Varro quæsiui, & inueni in Nonij tribus locis discerptam hanc partem libri De educandis liberis, quem Catonem inscribit, fortasse quòd Catonem sequeretur plurimum. is enim hac quòque de re præcepta perscribit. Ea ita composui. Cùm primò cibo & potione initiarent pueros sacrificabantur ab edulibus Edusæ, à potione Potinae nutrici. Sic cùm primùm fari incipiebant, sacrificabant Dio Fabulino; ali, Statano & Statiſino, quorum nomina habent scripta pontifices. Neque verò dubito quin eodem hoc loco de Cuba quòque meminerit; cuius tamen rei in ruderibus Varro- nis vestigium, quod sciam, nullum exstat.

CAPVT XXII.

Martialis aliquot locis emendatus. Bivira.

MARTIALIS libro v. epigrammate **XXII.**

*Quintum pro Decimo, pro Crasso, Regule, Marcum
Ante salutabat rhetor Apollonius:*

Nunc vtrumque suoresalutat nomine. quantum

Cura laborque potest, scribit & edidicit.

ms. Macrum. Incidebat enim iste quisquis fuit rhetor in contraria, hesitante memoria: & augebat vitium,

tium, quòd Crassi & Macri eiusdem gentis sint; vtri-
que enim Licinij.

Epigrammate III. libri VI.

Nascere Dardanio promissum nomen Iulo

Vera deum soboles: nascere magne puer.

rectè ms. *promissum numen.* Significat imperatorem
futurum Domitiani filium; nam ij tantum consecra-
bantur. Vnde nota vox Seueri Imp. mirari se fatum
Getæ filij, cui astra diuinitatem promitterent, spem
imperandi adimerent.

Epigrammate XI.

Quòd non sit Pylades hoc tempore, non sit Orestes

Miraris? Pylades Marce bibebat idem.

Nec melior panis turdisue dabatur Orestis:

Sed par atque eadem cana duobus erat.

ms. *Nec melior rhombus. rectius: & id probat, quod sub-*
iicit diuersum genus luxus in volucris.

Epigrammate XXXIII.

Inguina succinctus nigra tibi seruus aluta

Stat, quoties calidis tota foueris aquis.

Sed meus ut de me taceam, Lecania, seruus

Iudaum nulla sub cute pondus habet.

Sed nudi tecum iuuenesque senesque lauamur.

An sola est serui mentula vera tui?

Versu quarto planè legendum, nullus: pro non, ut sæ-
pissimè Latini. Sexto arbitror reponendum:

An sola est serui mentula verpa tui?

Eam enim causam sui tegendi etiam alij nescio cui
esse, Martialis alibi indicat.

Epigrammate LXXII.

Hinc vidua Cybeles, illinc sacraria Vesta,

Inde nouum, veterem prospicis inde Iouem.

libri scripti, *bivie Cybeles*. an fallor? an scribfit Martialis *biuire*, tum eam vocem vt explicaret Grammaticus adiecit. *hoc est, vidua*; eaque glossa in libros postea irrebsit. Vix est, vt hoc mihi possit eripi. Nam biuiras viduas Latinè dici Nonius docet adducto exemplo Varronis: *Ad biuiram venio, cum vellem ostendere quid vellem Metamelos inconstantie filius me reprehendit.*

CAPVT XXIII.

Pompa. Nihil amare. Cassa specula, terricula. Mulo inscitior. Multi. Cistellaria Plauti explicata, emendata.

CISTELLARIA Plauti prima statim fabula Silenium quærenti Lemniselenæ quo ad illam pacto Alcesimarchus insinuasset, respondet: *per Dionysia*

Mater pompam me spectatum duxit,

In quibus verbis poëta consuetudine sua ambiguo pereleganti lusisse videtur. pompam enim aut apparatus sacrificij intelligere licet, vt aliàs fere; aut ipsum Silenium. ad quod exemplum id Milite à parasito dicitur: *κ.ι.*

——— *que me ambæ obsecrauerint,*

Vt te hodie quasi pompam illac praterducerem.

Et voluit fortasse notare mores mulierum, quæ, vt verissimè Naso canit, ad huiuscemodi sollemnia

Spectatum veniunt, veniunt spectentur vt ipsæ.

Eadem scæna aliquot versibus pòst, cum puella matrem sibi iratam diceret, quòd domum se non recepisset, ex quo ducendam Alcesimarcho vxorem inaudisset, subiicit eadem lena; *Nihil amare iniurium est*: quæ verba subobscura, & nisi fallor, perperam hætenus accepta sunt. Ego arbitror hoc velle; non mirum esse, si mater irata sit. iniuriam enim accipere à filia,

filia, quæ nihil amet; hoc est, sine spe lucri sui, & eum cuius animus alibi occupatus sit: quorum neutrum meretriciam disciplinam addecet. cæ enim lucrum tantum, si frugi sunt, amant; adventores amare se simulant, dum id quod volunt auferant: tum inanes abs se amittunt, & Lucillij illud occinunt,

Quid mihi rautione hoc opus & tricone vadato?

Eadem fabula, Scæna Nullam ego me.

Non ecastor cassa memoro. nam obsecro vnde hæc gēitum. Cassa memorare, si locus bene habet, est frustrâ & nequiquam verbis sibi spem facere; cū in re nihil sit: à nuce cassa, quæ putamen habet, nucleo deficitur. ita cassam speculam Appuleius dixit, Milesiarum III. *Quin igitur masculum animum sumis, & cassa specula renuncias fortiter, & vltroneam te domina tua reddis?* & Afranius cassam terriculam, pro minis inani-bus; Priuigno: *apud Non. in Numeri*

Numerò inepti pertimuiſtis cassam terriculam aduersarij.

Scæna sequente:

Sed nōne ecastor ego sum multo inscitior, hos quæ rogem atque fatigem,

Qui semper malo muliebri sunt lubentes.

Ita O. I. veteres, vt testati sunt alij. verum est, aut veri saltim non dissimile, scribisse Plautum, *mulo inscitior*: quod adagionem vrbani & politissimo pœta dignum redolet. nam ita & mulos *παροιμωδῶς* nominabant stupidos & hebetes *ἡ ἀναιδής*. Catullus:

Mule, nihil sentis.

C A P V T XXIIII.

Duſum item locorum in Plauto correctio.

L E V E mendum contaminauit versum Plauti

G 5

Milite,

Milite, Scæna Nisi hercle defregeriris.

Euge euge eufchemè mehercule astitit dulcè & comædicè.
Mirum est tamen, neminem monuisse reponendum
heic, *dulcè & comædicè.* De seruo enim sermo est,
quem ait personam suam præclarè agere, & statum
in comœdia seruilem egregiè repræsentare. Equè fa-
cile fuerat maculam tollere è Sticho, Scæna Agite,
ite foras.

Nosmet inter nos ministremus Monotrophe. hoc conuiuium est.

Nam vera scriptura est, nisi admodum animi fallor,
N. i. n. ministremus. monostrophe hoc conuiuium est. Al-
ludit ad morem Scænicum, quo in orbem ibat can-
tio à strophis ad antistrophas: ita enim in conuiuiis
poculum à conuiuatoribus porrigitur pocillatori. at
hi ipsi sibi ministrabant, sine puerorum opera: quare
monostrophem illud suum symposiū urbanè vocant.

CAPVT XXV.

*Exigere. Defendere pro arcère. Auère. In Martiali versus
aliquot emaculati.*

MARTIALIS libro VII. epigramma XXVII.
ita concludit:

*Sic fora mirentur, sic te pallatia laudent,
Excolat & geminas plurima palma fores;
Otia dum medius præstat tibi parua December
Exigis & certa quos legis aure iocos.
Scire libet verum; res est hæc ardua: sed tu
Quod tibi vis dici dicere, Fusce, potes.*

Rogat scilicet Fuscum sales suos vt cognoscat, &
quid sui de iis iudicij sit, indicet: & cupere se qui-
dem verum sibi dici, si tamen id spissius futurum sit,
posse

posse eum gratiam, quam ponat in orationibus Fulci laudandis, sibi referre; vt fiat, quod dicitur, mutuum muli. Hæc sententia quo minus in ipsis versibus liquida & clara sit leue mendum facit, versu quarto: quod è fide vetusti codicis ita corrigo, *Exige, sed certa.* Exigere huic poëtæ accuratè perpendere & examinare est; vnde exacta, limata, &, vt cum Plauto loquar, amussitata. Suprà libro I I I I.

Non tetrica nugas exigit aure meas. Item V I.

Dum nostras legis exigisque nugas.

Epigr. x x x v. eiusdem libri:

Cùm pluuias madidumque Iouem perferre negaret,

Et rudis hibernis villa nataret aquis,

Plurima qua posset subito effundere nimbos

Muneribus venit tegula missa tuis.

Horridus ecce sonat Borea stridore december:

Stella, tegis villam; non tegis agricolam.

effundere nimbos, nescio an dixerit poëta; hac quidem in significatione. certè multò aptius huic loco quod mihi in mentem venit, & fortassean Martialis scribit, *defendere nimbos*. Notum est, id verbum pro arcere & repellere poni solère. M. Tullius pro Roscio Amer. *Iniuriam nouo scelere constatam putant oportere defendi.* Cæsar primo belli Gallici: *Quod bellum non intulerit, sed defenderit.*

Epig. l x x x. libri x.

Plorat Eros, quoties maculosa pocula myrrha

Inspicit, aut pueros, nobiliusue citrum:

Et gemitus imo ducit de pectore, quod non

Tota miser coëmat septa seratque domum.

Quam multi faciunt quod Eros, sed lumine sicco?

Pars maior lacrimas ridet & intus habet.

Labor vt emendem, & intus habet. Plerosque, ait, non absti-

abstinentiores esse Erote, sed prudentiores. idèd palam reprehendere cupiditatem tam apertam; clàm, &, quod aiunt, in pectore eadem illa requirere & desiderare. Auêre ἐρευνῆσαι, pro cupere; vnde auidus & auarus. Sic Lucillius apud Nonium: *cà insigni*

Cocus non curat codam insignem esse, dum pinguis fiet;

Sic animum amici quarunt, parafiti diuitias auent.

Neque tamen inficior posse ex publicata etiam lectione sententiam non incommodam elici; vt hoc poëta dicat, plerosque lacrimas ridere quidem, sed easdem tamen in pectore habere: verum quod nostrum illud argutius videbatur hominibus eruditis considerandum proponere volui, si fortè quibusdam non omnino displicuisset.

F I N I S.

ANTVERPIÆ EXCVDEBAT CHRIS-
TOPHORVS PLANTINVS, AR-
CHITYPOGRAPHVS, CIO. IO.
LXXXII. KAL. FEBRVARIIL.

ERRATA SIC CORRIGE.

Præfat. principio. *tam nusquam*. scribe, *tum*.

Pag. 13. verb. Ennij, *pugnare suos*. scrib. *sues*.

Pag. 19. *noceri posset*. scrib. *nocere*.

Pag. 26. *qui & consonandi*. scrib. *consonanti*.

Pag. ead. *Aucupare*. scrib. *Aucupari*.

Pag. 32. verb. Plauti. *ex insperato à portu modo*. scrib. *opportuno modo*.

Pag. 33. verb. Varronis scribe, *extra casa & porrecta*.

Pag. 39. *nobis*. scrib. *notabis*.

Ead. *istud bellè*. scrib. *bello*.

Pag. 41. *in commendandi*. scrib. *commendando*.

Pag. 42. Fugit me, Pomponium de origine iuris Crassum
• Mucij fratrem dicere. hoc igitur muto. de correctione, in sententia maneo: causas edisseram, deo faciente, alibi.

Pag. 53. *Titinnius Bubato*. scribe, *Barbato*.

Pag. 95. *locum Episatomo*, adde, *Cacily*.

Pag. 105. *vautone hoc*. scribe, *mutone*.

Si quæ præter hæc erunt, tute, spero, tibi indicabis.